

四庫全書

史部

欽定四庫全書

史部

山西通志卷一百一

詳校官監察御史臣查善長

檢討臣德生覆勘

總校官進士臣朱鈐

校對官學正臣常循

謄錄監生臣徐汝雄

欽定四庫全書

山西通志卷一百

名宦十八

絳州

宋

呂夷簡字坦夫壽州人蒙正弟子第進士補絳州軍事
推官天聖中參知政事拜同平章事罷歲中而復相
又與王曾同罷未幾復相封許國公兼樞密使詔拜

司空平章軍國重事以太尉致仕卒贈太師中書令
謚文靖夷簡於天下事屈伸舒卷動有操術後配饗
仁宗廟庭

李垂字舜工明道中知絳州修夫子廟還朝閣門祇候
李康伯謁之因謂曰舜工文學議論稱於天下諸公
欲用為知制誥但宰相以未曾相識盍一往見之垂
曰我若昔謁丁崖州則乾興初已為翰林學士矣今
已老大焉能趨炎附熱看人眉睫以冀推挽乎執政

惡之出知均州

慈卿字釋回咸平間聞喜令李垂修學記云田賦平而民足川原肅而寇絕

富弼字彥國河南人舉茂材異等通判絳州慶曆三年拜樞密副使四年遼人受禮雲中且發兵會元昊伐宋兒族於河東為近上疑二邊同謀弼曰兵出無名遼人不為也或請調發為備弼曰如此正墮其計臣請任之乃止遼人卒不動夏竦中以飛語乃出外累

遷宣徽南院使判并州至和二年召拜同平章事嘉祐六年母艱英宗初召為樞密使二年求解熙寧二年復同平章事尋爭新法出累封韓國公遼人爭河東地界言其不可許晉司徒卒謚文忠配享神宗廟庭

張昇字杲卿韓城人第進士以母老求知絳州嘉祐三年擢樞密副使遷參知政事樞密使致仕卒謚康節昇忠謹清直仁宗嘗謂為孤立云

宋敏求字次道綬子賜進士及第治平中知制誥判太常寺神宗初坐論宗室服貶秩知絳州然敏求議初不誤宰相曾公亮惡禮院因是去之是歲即詔還後加龍圖閣學士卒特贈禮部侍郎敏求藏書三萬卷熟朝廷典故嘗建言河北陝西河東舉子性朴茂而詞藻不工故登第者少請令轉運司擇薦有行藝材武者特官之使人才參用而士有可進之路又州郡有學舍而無學官故士輕去鄉里以求師請置學官

後頗施行之

李大臨字才元華陽人第進士為絳州推官杜衍安撫河東薦為國子監直講終天章閣待制大臨與宋敏求蘇頌稱熙寧三舍人

錢惟濟知絳州有強奪民條桑者不能得乃自斫其右臂誣以陷人惟濟引問面給以食盜以左手舉筋因語之曰他人行刃則上重下輕今下重上輕正用左手傷右臂也誣者引服

安公武威人為龍門令愛民課士寓撫字於催科正風
化於學校公餘講習舊業証辨新條能以經術飾吏
治嘗於廳事東作醉經庵以寓沈酣經籍之意汝南
袁幾刻石以頌其德政

劉騰字耀卿河南洛陽人溫叟子進士及第知龍門縣
羣盜殺人捕得之將械送府恐道亡去皆斬之衆服
其果後以龍圖閣直學士知河中府卒曠嘗善河中
處士李讀讀卒為陳其高行詔以著作郎贈之

謝皓字商老入太學與游權老龔吉老齊名時人目為
三老元豐中第進士歷金部郎官遼使至命皓代張
閔等接對皓曰不疑於物物亦誠焉苟待之以誠彼
雖無知亦當屈服明年以太常少卿使遼比還凡北
界山川地理名物情狀皆以聞遷司農少卿出守絳
州以公廉稱

唐肅字叔元杭州錢塘人七歲能誦五經第進士歷官
善辨疑獄嘗知聞喜縣終龍圖閣待制

金

梁肅字孟容奉聖州人幼勤學天眷二年擢進士第調平遙縣主簿遷絳縣令以廉入為尚書省令史仕至參知政事卒謚貞憲

范承吉字寵之好問學遼天慶八年進士內科歸金天眷四年從攻太原五年知絳州先是軍興民有為將士所掠而逃歸者承吉使吏徧諭俾其自實凡數千人俱白元帥府許自贖為良或貧無貲者以公厨代

輸六年改河東北路轉運使時承宋季之弊民賦繁重失當承吉為經畫立法簡便所入增十數萬斛官既足而民有餘歷同知平陽尹西京副留守遷河東南路轉運使歷鎮西軍節度使致仕卒

楊子益正隆中為聞喜令廉以持己優於治繁政績懋著民為立碑

郭通亳州人大定初擢陝西路轉運司都勾判官時晉絳戶稅轉運平涼通監視之官吏無敢有秋毫之犯

二州民舉手加額後為絳陽軍節度副使父老咸曰
此昔平涼閔恤我曹者也再期年大治絳人繪像於
天寧寺舍立石紀德終清河防禦使

王宗儒大定間為聞喜縣丞署縣事能決獄弭盜興學
愛民

王靚遂州人以詞賦擢進士第調聞喜丞廉潔詳辨民
皆畏服

高汝礪金城人大定中進士為石絳二州刺史人謂政

事文學可比樊宗師富鄭公後相宣宗號良相卒配
享宣廟

鈕祜祿貞西南路招討司人大定二十八年進士貞祐中
歷汾陽軍節度使四年改昭義軍充潞州經畧使興
定二年權元帥左都監守晉安府三年十一月城破
貞與府官十一人皆死之

納喇多羅羅大名路布爾罕明安人寡言笑好讀書承
安二年進士第一除應奉翰林文字貞祐中遷絳陽

軍節度使權河東南路宣撫副使是時兵興多囉羅
完城郭繕器械料才壯為鄉兵延問耆老招致儒士
咨以備禦之策鹽米儲待勸富民出粟郡賴以完賜
詔褒諭加資善大夫官其次子烏紳改權經畧使被
召以疾不能行卒於絳州

孔祖湯泰和三年進士興定中為寶昌軍節度副使與
霍州刺史阿里哈同被元獲令之跪不從而死贈資
善大夫同知平陽府事

孫鼎臣為河津令以辟舉入仕清慎明敏才極一時之選號良吏

張升大同人為絳州錄事趙偉反謂所識者誼不能從赴水死

元

劉亨范陽人元初以功充行軍副總管時河東被兵之餘民物空竭上言建國以民為本今河東殺掠殆盡收存恤亡此其時也會以絳州邊地難其人授亨絳

州節度使兼行帥府事卒於師無子兄德仁襲職金
將移刺副樞攻絳州城陷死之

靳和曲沃人居鄉喜周貧乏導人以善後仕元知絳州
政治公平

岳弘南頓人至元十八年為垣曲尹兼管諸軍治有殊
績縣治儒學並景山亭皆其所建

彭仲德東明人至元中知絳州有遺愛碑

左庫庫楚河間東光大德七年知垣曲縣性廉介好

讀書法令嚴明吏民畏服有去思碑

王傑澤州人延祐間任聞喜縣尹均賦康時興學倡化
廉幹多著美績

劉尚質曲沃人泰定間任稷山縣尹守已清廉為政平
易後遷翰林院編修擢御史忠直敢言得風憲體引
年休致日與學士靳榮題咏邑人以二賢名之

巴爾斯布哈偃師人舉進士知聞喜縣六事備舉政治有
聲部使者舉為守令之最朝廷遣賜宮幣以旌之

葛禔字克敬文安人至正二年任稷山縣尹撫民多方
邑樹碑頌之

李榮祖雲中人至正初知絳州有政績碑

宋克薦長白人至正間進士知絳州時稱其文章政事

方文潞公

劉履謙至正間以絳判知絳縣政績昭著

徹爾特穆爾景州東光人至正十九年任稷山達魯噶

齊睦察察撫百姓興利革弊政化大行

程元直亳州人初知交城勸農興學政平訟簡人心悅
服陞知絳州

王晉卿安民坊人官金牌元帥守孟津立大功

伊遜唐古人至正十八年自中書任稷山達魯噶齊才
猷過人愛民如子時賊寇逼境邑人大恐欲潰伊遜與
縣尹張名昭主簿法顯祖同心協謀以為備禦卒賴
保全民立碑頌之

張名昭順德人至正十八年任稷山縣尹撫民禦賊與

伊遜同政

明

陰曠容城人洪武間任聞喜以廉幹稱

李公讓濮州人中書省掾洪武初任稷山勤慎公廉修
舉廢墜後調江西新喻縣民攀戀不忍其去

顧登洪武十年任絳州知州精彊有心計凡廟社祠壇
踵前牧經理者或修或建規制悉備祀名宦

王汝霖江西湖口人洪武間以進士任河津縣知縣性

廉敏有理煩治劇材政事修舉民安其化開國初治
行最著祀名宦

崔弘毅丹徒人洪武初任垣曲值羣盜競起設法弭之
民賴以安後陞湖廣僉事

林軒樂清人永樂十六年以舉人任稷山縣教諭學深
養邃日引諸生與講忠孝大節師範丕著祀名宦

張居彥浙江上虞人永樂十九年以舉人任絳縣訓導
學優行修被其教者皆卓然能自樹立累官福建僉

事祀名宦

董威同州人永樂間稷山教諭善於提誨士多樂從
王汝積浙江金華人宣德間以舉人知絳州絳居民稠
密產薄稅重多健訟汝積謂人給斯教可行教行斯
訟可息躬歷隴畝勸農桑課勤惰不數年土田悉墾
漸饒裕乃大葺孔子廟修舉學政勵諸生延師儒教
民間子弟雖愚且賤懇懇誨之不倦旁邑民間以事
至亦必教以敦本節用之道凡有徵集第書片紙付

里甲悉踴躍樂赴無敢後者舊俗好鬪不勝輒投井死親屬厚誣必至破產乃已嚴禁之有自斃者槩不受理劫盜出其途能先知即掩補置之法在任九年訟息獄空教化大行當考績遽卒士民勒其政蹟于石祀名宦

李學河南祥符人正統四年任絳州知州執法不撓洞悉民隱所興舉悉得體要民肖像羊舌廟中祀名宦劉智山東長城人正統十四年以監生任絳縣知縣性

溫厚為政以公平著歷九年百姓走闕下乞留晉六
品階仍知縣事又九年始致仕歸祀名宦

李哲正統間知垣曲縣因舊城狹隘兼以南面湮沒展
修高丈餘民賴保障尋修廳宇厥功甚偉

包得仁蒙陰人正統間知絳縣法令嚴明豪強懾服才
能卓越調文水

胡士寧江西樂平人景泰元年任稷山縣知縣廉幹有
為涖任時見城池頽廢慨然以修濬為任勞來有方

祀名宦

朱凱肅寧人景泰初知垣曲縣興學校勸農桑政績甚著陞太僕寺丞

趙愷陝西清水人天順七年任河津縣愛民如子號稱長者邑大旱禱雨有應立碑儀門左

張諒河南鹿邑人天順八年以貢士任稷山縣知縣清介甘淡泊雅能優禮文士布德施惠吏民悅服而革弊除奸以嚴行愛尤得惠人遺意擢知吉州祀名宦

言芳山東鄒平人成化六年以進士任絳州知州學有
盛名居官清正衙舍蕭然幾可羅雀尋以憂去祀名

宦

賈定河南通許人成化十八年以進士任絳州知州通
敏有吏材遇疑難能立為剖畫絳有屠人誘人出殺
諸谷中歸而私其妻不從復殺之而樓其處女隨鬻
他所以滅其迹事久弗白定廉得之論如法絳有積
薪逋者破產廢家仍無以償定立法通一州丁戶共

足其數自是歲無逋者嘗立善惡二籍歲終覈其實
誅賞有差會大飢絳人獨免因上救荒八事是年平
垣曲盜規畫所及鄰境胥受賜後改易州尋復擢山
西僉事祀名宦

劉觀平度州人成化間知絳州廉勤威斷吏畏民懷居
三年懇求休致得命之日即單車就道循良之迹去
就之義不愧古人

蔡綦東萊人成化間絳縣訓導勸課士業督修學宮

張瑤華陰人成化間絳縣訓導敬以持己勤以課士陞
國子監助教

茹紹賢鳳翔人成化間知垣曲縣明斷廉能豪強屏跡
陳能安化人成化間知絳縣有功民社政績茂著

張詢字信卿延安衛人持身清介篤信好學動以古人
為法授徒幾百人成化間以監生任聞喜丞嘗為縣
輸餉延綏總兵詢鄉人也為留羨餘金以遺之詢還
貯之縣庫上其事于府後致仕歸貧不能自存詢處

之泰然以壽終

王琳山東安邱人弘治十一年以舉人任聞喜縣知縣
雅志廉潔為政以威嚴勝吏胥震疊豪猾聞風斂迹
又以其暇葺學宮修縣志祀名宦

吳璇山東高唐人弘治初以舉人任垣曲建倉儲蓄以
備歲荒增舍講習士類翕然嚮風十三年調繁聞喜
縣知縣明敏洞悉民情見文廟規制未備力以修葺
為任創兩廡易櫺星門堅緻完好祀名宦

楊澤直隸河間人弘治間以進士任聞喜縣知縣廉潔
有才畧居官條理精詳一時夙弊盡革而尤以學校
農桑為本祀名宦

張憲涇陽人性至孝朝廷旌之弘治間絳州學正持已
清慎誨人勤篤又嘗捐俸造祭器有碑存焉

蘇昱武邑人弘治間任絳縣剛毅果斷立城市集場

鄧中和膠州人弘治間垣曲教諭學行殊常教化丕振
後先莫能出其右

晁讓山東東阿人正德三年以舉人任河津縣知縣廉
介無私遇事惟法制是守雖權貴不為屈祀名宦

來亨胙城人正德五年以舉人任稷山縣知縣明敏練
吏事以廉自勵革除一切陋規而繕城垣緝賊盜具
得方畧祀名宦

王一麟四川青神人正德七年以進士知絳縣政平訟
簡和易近民暇日與諸生講解吟咏禱雨多應陞戶
部主事

王誥直隸靈壽人正德八年以貢生任河津縣教諭篤
學恥言利日進諸生課誦讀尤以修行為本模範秩
然祀名宦

易謨河南固始人正德九年以進士任絳州知州清而
有為熟悉民間利害興除胥得其宜政聲最著擢西
安府同知樹去思碑肖像富鄭公祠中祀名宦

李文潔江西貴溪人正德十二年以舉人任絳州知州
性剛正遇事能洞本末斷以行之無留滯嘗為興學

校毀淫祠均賦稅鋤豪強風清弊絕擢建寧同知祀
名宦

王松年陝西寧夏人正德十四年以監生任稷山縣縣
丞慷慨有長材涖官以廉幹著後回賊犯境督民兵
禦之遂被害

史章長垣人正德間絳縣教諭勤敏課士

毛纘長垣人正德間絳縣教諭溫溫持己循循教人

李時直隸涿州人正德間以進士任聞喜縣知縣伉直

不撓而豁達有遠畧先知長安以忤逆瑾去及涖聞
喜直流寇亂談笑間守禦具備為當路所忌仕卒不
達祀名宦

王諤陝西西安人正德間以進士任河津縣知縣性剛
明遇訟獄立為剖決然務持大體嘗繕完城郭改建
學校政教修明擢主事歷兗州知府祀名宦

張廷相河南杞縣人監生嘉靖四年任垣曲縣丞清苦
自勵重修廟學壇壝頑懾服值蝗旱多方拯救復

詣京疏請發帑金六千兩穀千石民賴以活後見嫉
上官被逮久之事白丁艱去百姓擁道號泣為立碑
肖像祀之

李朝綱陝西武功人嘉靖五年以舉人任聞喜縣知縣
性廉介自奉甚薄以布為被雖汙不易於衙蠹市魁
馭之甚嚴凶荒發粟賑飢祀名宦

閻倬陝西隴州人嘉靖八年以舉人任聞喜縣知縣疏
食練服自奉如布衣嘗裁革侯馬貼役又擇諸生三

人授以春秋後皆登甲乙榜祀名宦

高義河南葉縣人嘉靖八年以舉人任稷山縣知縣廉而能平遇事公謹吏民畏服歲飢設法賑貸祀名宦

李光遠直隸平山人嘉靖十三年以監生由縣丞陞知絳縣公介廉慎改建學校新縣治及幕所鐘樓政績顯著陞平涼府通判民遮道送者百里不絕

于藁直隸長垣人嘉靖二十三年以舉人任稷山縣知縣性剛直遇訟獄剖決如流先任武陟調今官益勤

其職興學校禁奸頑修築城池民爭鼓舞擢蔚州知州祀名宦

溫季春陝西涇州人嘉靖二十三年以監生任稷山縣縣丞嘗奉委催科能令民競相勸輸在任九年清慎如一日祀名宦

金翮山東樂清人嘉靖三十二年以刑部郎中謫絳州同知有清操愛民如子念絳牛頭遠赴瑞石驛為累滋甚力請折銀解納後攝州事興利除害節省歲數

千金擢徽州通判祀名宦

羅田河南光山人嘉靖三十九年以進士任聞喜縣知縣寬弘不苛平心御物刑政皆有條理祀名宦

李復聘陝西蓋屋人嘉靖四十年以進士知聞喜縣持已嚴峻遇物和平長才大畧修舉百廢城池公署廟祠坊表營繕一新然皆取諸宮中未嘗擾及民間歲遇大旱復聘刺血為文禱于神畢倚廟牆而哭是夕雷雨大作四野霑足歲大熟後擢御史為關中六君

子之一聞喜人祀之畏壘六名宦祠中

馬三樂山東陽信人嘉靖四十二年以進士任聞喜縣知縣挺特有定守嘗毀淫祠或說以禍福不為動設法賑飢加意興學邑初逋稅甚多至是悉勸輸如額上官爭異之祀名宦

邢化山東臨邑人嘉靖四十三年以官生任絳州知州廉辦不為刻覈遇訟獄悉令自拘有以和息請者即聽之弗徵贖緩學正李必昌南海人也與其妻一時

俱卒稚子弱女貧不能歸擇義民老媪護送歸里擢
延安同知祀名宦

蕭儼陝西涇縣人嘉靖四十三年以兵馬使謫絳州同
知博學工文議論悉本經史舊例汾水架橋板椿之
徵歲以百計儼署篆以舊板收貯候用壞者易之不
復徵銀後遂奉為成法署臨汾臨晉諸縣俱有聲祀
名宦

史載德任邱人嘉靖間以進士知聞喜縣威重廉勤賑

饑荒懲讒橫除協夫設館餐修學舍明條教嘗以均糧遺悔邑人不怨桐鄉畏壘首祀之

張問行內黃進士嘉靖間任聞喜咨利弊正風俗戒奢靡立品節勸農桑給牛種作養人才平息詞訟與物無忤雖婦人小子見之不異家人陞監察御史有生祠

李棠清苑人嘉靖間以員外郎謫稷山典史政尚嚴明志甘清苦均里甲減徭役有德於民

嚴天祥朝邑人嘉靖進士知絳縣廉正執法民有毆傷人股以死者累檢股無他天祥取二股察其形色迥異一訊具服遠近稱神以治行異等陞御史

劉朝麒臨洮衛舉人嘉靖末知絳州絳有靈邱藩封招納無賴子弟甚為民害朝麒正其罪諸宗人欲危之朝麒論以法卒解去

宋應昌浙江仁和人隆慶元年以進士知絳州州城濱汾常患水嚙應昌至築石隄護之民間地糧多飛詭

應昌親為清丈弊永絕公館供具舊皆派之里甲應昌悉以官辦閭閻無擾後歷官右都御史祀名宦

馬文朝邑舉人隆慶初聞喜教諭老成忠厚廉靖安詳遇寵辱而喜怒不形重道義而束修不校卒於官士人咸慟惜之

張汝乾陝西洛南人隆慶四年由貢士知河津縣築城池修隄堰興水利放里長正赤厯編審悉公嚴課士子崇正學飭祠宇治邑若家修復縣志

張允濟固安人隆慶間以郎中出知絳州丰度威嚴不
事鈎索人自不欺甫一年以內艱歸人咸惜之

文作涪州人隆慶間以進士知聞喜縣清苦勤慎洞悉
民情陞兵部主事

申田靈壽人萬厯初以進士知聞喜縣布衣蔬食儉約
自甘胥吏有進羨餘者指戒石語以矢之民有匹馬
清風之謠

敖得義湖廣竹溪人萬厯四年以歲貢任絳州同知和

而能介州人多以產構訟牧委得義聽之惟理是直
一無所徇擢南安通判祀名宦

馬懋山東安邱人萬曆十年以恩貢任稷山縣知縣清
勤剛斷勇于任事遇歲荒請賑倍他邑捕巨盜王邦
清立斃之嘗申減代納文水嵐縣徭銀七百兩尋卒
於官祀名宦

劉庚山東壽光人萬曆十三年任絳州同知以文涉時
政由南都主事左遷一時名震中外時州牧復而奢

聞庚至乃稍自戢未幾以艱去後累官浙江按察使
祀名宦

苗應元山東武定人萬曆十七年以舉人任稷山縣知
縣時當大荒後民間疾苦悉為祛除賦役火耗禁之
尤切吏胥悉凜凜不敢上下其手甫年餘遽卒于官
百姓如失怙恃祀棠陰祠

劉一相山東長山人萬曆十九年以進士任稷山縣知
縣愷悌慈祥尤加意學校拔諸生雋異者親為講授

諸生奮起以不得與為恥擢南京兵部主事祀崇陰
祠

杜濬直隸任邱人萬曆十九年以舉人任絳州知州廉
明能斷然樂與民相安絳俗故輕生雖小忿輒自斃
以累人濬嚴禁之有犯者悉令自瘞俗為一變佐貳
咸閉戶安坐無所事事尋致仕歸祀名宦

李希召河南蘭陽人萬曆二十一年以進士任稷山縣
知縣廉明善斷事無留滯衙蠹市魁相率吐真情絳

藩聞之亦戒左右無犯遇士大夫特厚貧乏者資給
之或有冤抑必亟與昭雪調合水縣祀棠陰祠

陳大烈江南丹徒人萬曆二十七年以監生任稷山縣
縣丞明敏清慎常奉檄催徵悉却常例弗進後署縣
篆以安靜為治境內帖然祀棠陰祠

白鯤直隸南和人萬曆三十二年由舉人任河津縣修
遮馬峪清泉灌于間等里民田至今賴之陞本府同
知

崔儒秀字敬初河南陝州人萬曆三十三年以進士知絳縣性敏捷有胆識發奸摘伏如神勤于課士親為指授縣人代鄉寧安邑輸納苦累滋甚力請得豁免尋調翼城累官開原監軍道遼陷殉節死祀名宦

吳峻陝西鳳翔人萬曆三十四年以舉人任稷山縣知縣雅甘淡泊日用薪米悉自給不委支役上下省會以一二隸自隨見者不知為令君也嘗立大社集諸生論文開薛村渠使資灌溉甫八月以憂去祀棠陰

祠

喬允升孟津人萬厯間以進士知聞喜縣長才雅量有政聲因錢糧合戶催徵奸民每多拖累乃設門簿至今便之

張耀字融我三原人萬厯中舉於鄉除聞喜知縣以慈惠撫民民為立祠歷官貴州布政使寇孫可望等至不屈死

周鳴秦商州舉人萬厯間任聞喜縣清而不苛勸民完

通稅諭民息爭訟立月課取名士甲乙之民有乏耕
具者民間婦女有乏紡車者官給之以疾卒士民慟
惜之

時化澠縣人舉人萬歷末知聞喜縣廉介敏練剛正無
私興利除弊事事求為可久申革力銀貽惠無窮執
法不撓為權勢不喜遂解綬歸百姓攀號不忍舍歷
久猶思念之

薛承教咸陽進士萬歷間任稷山剛明開爽率正不阿

遇事擔當興除無遺力申減站銀創建汾橋永為民
便陞南京戶部主事有去思碑

王豫立涇陽進士萬歷間知稷山縣慈愛精明時礦使
四出大璫將臨稷邑妄云鳳凰山銀可採以文走使
止之去之日囊無一錢士民攀送號泣有生祠

陳堯賓遵化吏員萬歷間稷山主簿幹局絕敏丈田多
所擘畫大荒盜無巨細悉籍其名有犯無不立獲羣
盜股慄避跡境中以安陞齊河縣丞

馬文烜河南項城人天啟五年由舉人知河津縣清廉仁厚士民如依慈母尋以耿直不容于時被論去卧轍攀轅車不獲前文烜喜曰士民如此無官愈于有官矣後為塑像河汾廟

秦宗文武陽人崇禎五年任垣曲典史有胆畧流寇入犯宗文督鄉勇隨大兵進勦與賊遇奮臂力戰所向披靡遂歿于陣事聞祀忠烈祠中

雷卬陝西郃陽人崇禎六年以舉人任絳州知州忠厚

朴直于士民曲加惠愛遇大猾為民患者則立殲之
祀名宦

國朝

張文德遼東人順治三年知垣曲縣刑清政簡潔己愛
民卒于官士民感涕建祠祀之

李榮宗山東費縣人順治四年以進士任垣曲縣知縣
姜逆之亂城陷被執罵賊死

贈按察司僉事廕子入監祀忠烈祠

周茂覺浙江人順治間任垣曲縣典史嘗積其功修廳署不傳舍視之姜逆之亂死於城守

邵起鳳正藍旗人順治七年以貢知垣曲縣姜逆之亂賊黨破縣城盤踞垂一年民日夜望解倒懸及大兵至或議屠戮起鳳時未涖任適在軍亟請於主者曰垣人從賊乃迫於不得已非其本心今奉辭伐罪正宜開釋無辜與之更始若肆為殺戮殊非國家弔民至意且有地無人亦何需此曠土為主者因下令安

戮平民者按軍法入境市不易肆垣人胥安堵無恙
孟孔脉字祖尼富平人康熙元年以舉人任稷山知縣
明於聽斷訟者胥心服無後言歲饑民多鬻子女蠲
俸贖之凡百餘人歸富平卒

崔鳴鷺內邱人康熙八年以進士知河津縣首革現役
雜派諸弊均水利正經界嚴保甲抑豪強修學建橋
以次畢舉措置有方事集而民不擾民愛之外艱歸
冒風雪走上官祈留鳴鷺中夜去後數年有同姓宦

過者民閔傳以為鳴驚復至趨迎如驚既而知其訛
輒嗟嘆者久之

朱天爵正紅旗漢軍康熙十八年以監生知稷山縣甘
澹泊蔬米胥平買馭吏甚嚴馬草豆舊出自民間胥
給價購買客兵過境銜勒有法後擢都察院經歷

許自俊江南嘉定人康熙十九年以進士知聞喜縣攜
一子一僕食脫粟飯佐以青菜往來郡會城策蹇而
已贄上官詩綾扇外無他物用法平民多勸輸雅工

詩文名勝地題詠殆徧尋以乞休去行李蕭然當時
稱清白吏

許穀字詒孫江南常熟人康熙四十二年以翰林庶吉
士改垣曲知縣噢咻疾苦有古循吏風尤以振起斯
文為急徵賦時輒進排年問鄉讀書若干人隨以題
往文成即令排年攜來為論次其當否蓋恐往返道
塗或至廢日也間得雋異士輒加優禮以勸繇是窮
鄉後進胥靳詣令君商榷文字朴蹇之習一變凡平

陽大小試胥贊誦垣曲文風不輟涖任八年以憂去
垣曲士民至今思之

吉州

北魏

裴慶孫聞喜人正光末汾州吐京郡部聚黨作逆慶孫
擊之大潰後復鴈集北連蠡升南通絳蜀免徒轉盛
慶孫又討之至汾陽城朝廷以此地披山帶河衿要
之所遂立郡因以慶孫為太守假節輔國將軍

斛律金朔州勅勒部人性敦直善騎射行兵用塞外法
望塵識馬步多少嗅地知軍度遠近初為軍主與懷
朔鎮將楊鈞送茹茹主阿那瓌還瓌見金射獵深歎
其工後瓌入寇高陸金拒擊破之正光末破六韓拔
陵反金度陵終敗滅乃統所部萬戶詣雲州授第二
領民酋長稍引南出黃瓜堆為杜洛周所破部衆分
散金與兄平脫身歸爾朱榮累遷都督從破葛榮齊
高祖建義山東金贊成大策留守信都領恒雲燕朔

顯六州大都督從平晉陽追滅爾朱兆太昌初為汾州刺史當州大都督從高祖破紇豆陵於河西天平初遷鄴使金領步騎三萬鎮風陵以備西冠軍罷還晉陽沙苑不利東雍諸城復為西軍所據金與尉景庫狄干等討復之太和中高祖禦周文帝於河陽使金徑往太州為犄角之勢金到晉州以軍退不行仍與行臺薛循義共圍喬山之寇俄而高祖至共討平之因從高祖攻下南絳邵郡等數城武定初除大司

馬轉第一領民酋長三年高祖出軍襲山胡分為二道以金為南道軍司繇黃櫨嶺出高祖自出北道度赤洪嶺會金於烏突戍合擊破之四年詔金繇冀州率衆從烏蘇道會高祖於晉州仍從攻玉壁軍還使金總督大衆從歸晉陽世宗嗣事為肆州刺史齊天保初封咸陽郡王刺史如故冬朝晉陽宮金病帝幸其宅臨視病愈還州三年就除太師從征奚賊軍還帝幸肆州與金宴射而去四年解州還晉陽車駕復

幸其第六宮及諸王盡從置酒作樂極夜方罷帝忻甚詔金孫武都尚義寧公主成禮日帝從皇太后幸金宅皇后太子及諸王等皆從其見親待如此後詔率二萬騎屯白道以備茹茹寇帥豆婆吐久備將三千餘戶密欲西過候騎還告金勒所部追擊盡俘其衆茹茹但鉢將舉國西徙金獲其候騎送之并表陳擊取之勢顯祖於是率衆與金共討於吐賴獲二萬餘戶而還晉位右丞相遷左丞相卒年八十贈假黃

鉞相國謚武

房謨字敬叔河南洛陽人其先代人也少淳厚正光末
歷代郡太守著廉惠聲及六鎮亂謨率郡人入九崢
山結壘拒守外無救援奔中山孝莊時除大寧太守
爾朱榮死其黨徵兵謨不應前後斬其三使遣弟毓
詣闕孝莊以毓為都督毓弟欽為行臺並持節詣謨
同為經畧及洛京陷為賊黨建州刺史是蘭安定執
繫州獄蜀人聞謨被囚並叛安定給謨弱馬令軍前

慰勞諸賊見謨莫不遙拜謨先所乘馬安定別給將士戰敗蜀人得之謂謨遇害莫不悲泣善養其馬不聽乘騎兒童婦女競投草粟皆言此房公馬也其結愛人心如此孝靜時除晉州刺史加驃騎大將軍又攝南汾州事先時境接西魏土人多受其官為之防守至是酋長鎮將及都督守令前後降附者三百餘人謨撫接殷勤人樂為用爰及深險胡夷咸來歸附謨常以己祿物充其饗齊文襄嘉之聽用公物西

魏懼乃增置城戍慕義者自相糾合擊破之自是龍門以北西魏戍皆平文襄特賜粟千石絹二百匹班示天下卒於州州府相率贈物及車牛妻子遵其遺志拒而不納贈司空謚曰文惠

皮景和琅邪下邳人父慶賓正光中使懷朔遇世亂因家廣寧之石門縣景和少通敏善騎射武定二年征步落稽世宗疑賊有伏兵令景和將五六騎深入一谷中值賊百餘人便共格戰景和射數十人莫不應

弦而倒高祖嘗令景和射一野豕一箭而獲之深見
歎賞封永寧縣開國子從定稽胡從討茹茹菴羅辰
於陁比又從平茹茹餘燼河清三年突厥圍逼晉陽
令督領後軍赴并州未到賊已退仍除領左右大將
軍又除并省五兵尚書周通好後常令景和對接每
與使人同射百發百中武平中又從斛律光率衆西
討尅姚襄白亭二城別封永寧郡開國公晉文城郡
王卒

北齊

堯奮字彥舉上黨長子人雄弟也賜爵安夷縣子晉伯
為南汾州刺史胡夷畏憚之西魏行臺薛崇禮舉衆
攻奮與戰大破之崇禮兄弟乞降送於相府轉潁州
卒

北周

宇文測字澄鏡太祖族子少篤學旬月不窺戶牖尚宣
武女陽平公主從孝武入關封廣川縣公大統六年

除使持節大都督行汾州事測政存簡惠頗得民和地接東魏數相鈔竊或有獲其為寇者多縛送之測皆命解縛置之賓館然後引與相見如客禮焉仍設酒饋宴勞放還其國并給糧餼衛送出境自是東魏人大慙乃不為寇汾晉之間各安其業兩界之民遂通慶弔不復為仇讐矣時論稱之方於羊叔子或有告測與外境交通懷二心者太祖怒曰測為我安邊吾知其無二志何為間我骨肉生此貝錦乃命斬之

仍許測以便宜從事卒謚靖

韓裒字弘業居昌黎涉獵經史深沈有遠畧避地夏州
太祖時為刺史待以客禮裒勸令赴平涼周保定三
年為汾州刺史州界北接太原當千里徑先是齊寇
數入民廢耕桑前後刺史莫能防扞裒至適會寇來
裒乃不下屬縣人既不及設備以故多被抄掠齊人
喜相謂曰汾州不覺吾至先未集兵今者之還必莫
能追躡我矣由是益懈不為營壘裒已先勒精銳伏

北山中分據險阻邀其歸路乘其衆怠縱伏擊之盡
獲其衆故事獲生口者並囚送京師哀因是奏曰所
獲賊衆不足為多俘而辱之但益其忿耳請一切放
還以德報怨有詔許焉自此抄兵頗息哀歷事三帝
高祖常以師道處之卒謚貞

楊敷字文衍華陰人鈞之孫也少有志操襲鈞爵臨貞
縣伯周初晉侯保定中陳公純鎮陝西以敷為總管
長史天和六年為汾州諸軍事汾州刺史晉公齊將

段孝先率衆五萬來寇梯衝地道晝夜攻城數親當
矢石隨事捍禦拒守累旬孝先攻之愈急時城中兵
不滿二千戰死者已十四五糧儲又盡公私窮蹙齊
公憲總兵赴救憚孝先不敢進軍敷知必陷沒乃召
其衆謂之曰吾與卿等俱在邊鎮實願同心戮力破
賊全城但彊寇四面攻圍日久吾等糧食已盡救援
斷絕守死窮城非丈夫也今勝兵之士猶數百人欲
突圍出戰生死一決儻或得免猶冀生還受罪闕廷

孰與死於寇乎吾計決矣於諸君意何如衆咸涕泣
從命敷乃率見兵夜出擊殺齊軍數十人齊軍衆稍
却俄而孝先率諸軍盡銳圍之敷殊死戰矢盡為孝
先所擒齊人方欲任用之敷不為之屈遂以憂懼卒
於鄴高祖平齊謚忠壯

唐

劉迫由進士任吉州刺史性剛直夙稱廉能理民決訟
悉推誠布公祀名宦

宋

劉舒皇祐三年任鄉寧縣初縣治附河數遭水患舒改
遷故壘自是民有寧宇

朱弁婺源人建炎間為吉州圖練使如金通問守節不
屈

金

伍禮厚興定中任吉州同知元兵陷吉與其妻墜崖死

元

牛天麟恒山人元貞年任鄉寧縣重建文廟作興學校
王元士字堯佐恩州人至正四年以進士任吉州知州
為政不苛士民咸戴祀名宦

時公權任吉隰二州統兵官河南中書行省右丞課士
撫民教養移俗練兵設備恩威兼濟嘗禦寇炳七寨
為時保障二郡賴之

明

王暉狄道人永樂間鄉寧主簿廉潔慈祥撫字有方民

懷其德歷久頌之

辛繼先襄城人吉州學正一介不取忠厚正直人稱為
義皇以上人祀名宦

蔣賜安樂縣人嘉靖二十一年以進士知吉州崇學校
築城垣稱良牧馬陞陝西僉事

包鍾乾州人嘉靖間吉州判事母以孝愛民以仁創築
外城不私派一錢

張敬一韓城舉人隆慶間任鄉寧精明歷練減賦清田

民懷吏畏為一時循吏冠八祠名宦

李時茂乾州人萬厯年以舉人知鄉寧縣節愛恤民嚴
明馭吏嘗捐俸修常平倉及養濟院整理儒學號舍
清逋賦完額稅鄰民訟上官咸願得鄉寧李青天廉
時論稱之

楊家龍曲陽縣人崇禎十年由選貢知鄉寧縣拯災傷
撫流困清操亮節三載如一當流寇蹂躪時邑猶賴
以稍甦焉

國朝

侯世爵遼東人順治七年以貢知鄉寧縣姜逆之變賊黨衛敏破縣城據之焚掠甚慘世爵簡卒徒躬自督率誓不與賊俱立賊聞風震恐委城去世爵招撫流亡慰安反側閱二年民始有更生之樂比解組百姓多攀轅流涕

隰州

唐

李琛高祖從父兄子封襄邑王歷蒲絳二州總管宋金剛陷滄州時稽胡多叛轉琛為隰州總管以鎮之馭衆寬簡夷夏安之三年卒

甯嘉勛聖歷三年為永和丞愍懷被害官府僚吏莫敢近嘉勛解衣裹首號哭時人義之宗楚客聞而大怒收付制獄貶平興丞尋卒睿宗初下制曰甯嘉勛能重名節事高欒向幽塗已往生氣凜然靜言忠義追存褒寵可贈永和縣令

宋

李謙溥并州孟人周世宗征劉崇說降遼州刺史張乙
師還留為晉州兵馬都監屢捷詔褒之顯德四年署
權隰州事浚城隍嚴兵備并人至與節帥楊廷璋夾
攻敗之五年破孝義仍監軍建隆四年為慈州刺史
兼晉隰緣邊都巡檢行石州事以興同砦為治所冬
與諸將入陰地關還次白壁關獨振甲嚴備并師至
獲全尋移隰州刺史開寶元年為汾州路都監太祖

征晉陽為東砦都監伐木西山以給軍用未至聞鼓聲乃并人逼西砦大將趙贊禦之并眾未退謙溥麾所部赴之太祖遽至觀戰怪其赴援者非精甲問之乃謙溥也上甚喜謙溥在州十年敵人不敢犯境有招收將劉進勇力絕人謙溥撫之厚藉其死力往來境上以少襲眾并人患之為蠟丸書以間進伴遺書道中晉帥趙贊得之以聞太祖令械進送闕下謙溥上言進為并人所惡此乃反間上遽釋之三年召還

後邊將失律復為晉隰緣邊巡檢使邊民聞之喜爭相迎勞於道左六年拔太原七砦八年疾歸卒賻贈有加

姚坦字明白曹州濟陰人開寶中以尚書擢第調補江陵尉歷隰州推官將作監丞知潯州太平興國三年召還為著作佐郎通判唐州八年諸王出閣詔給諫以上於朝班中舉年五十以上通經有文行者以備宮僚乃以坦為皇子翊善仍賜緋魚歷殿中丞倉部員外

郎賜金紫遷本曹郎中轉考功仍為益王府翊善坦
性木強固滯王嘗於邸中為假山費數百萬既成名
賓僚樂飲置酒共觀之坦獨俛首王強使視之曰但
見血山耳安得假山王驚問故坦曰在田舍時見州
縣催租鞭笞流血被體此假山皆民租稅所為非血
山而何是時太宗亦為假山聞而毀之王少佚豫坦
即醜詆上嘗戒之曰元傑知書好學亦足為賢王矣
少不中節亦須婉辭規諷况無大故而詆訐之豈裨

贊之道邪頃之左右乃教王詐稱疾不朝太宗日使
視疾逾月不瘳甚憂之召王乳母問狀乳母曰王本
無疾徒以姚坦檢束居常不得自便王不樂故成疾
上怒曰吾選端士輔王為善王不能用其諫而又詐
疾欲使朕去正人以自便何可得也且王年少必爾
輩為之謀耳因命粹至後苑杖之數十召坦慰諭曰
卿居王宮能以正為羣小所疾大為不易卿但如是
勿慮讒間朕必不聽王薨改衛尉少卿判吏部南曹

景德初求補郡俾知鄧州轉運使表其治狀詔嘉獎之大中祥符初復知光州二年卒年七十五

葛懷敏知隰州有守禦功

薛奎字宿藝絳州正平人第進士真宗時任隰州軍事推官州民嘗聚博僧舍一日盜殺寺奴取財去博者適至血偶浣衣邏卒捕送州考訊誣服奎獨疑之白州緩其獄後果得殺人者仁宗初章獻稱制時或讒奎絲中丞改授集賢院學士知并州累官叅知政事

卒謚簡肅

趙及字希之幽州良鄉人父德遼蔚州靈邱令歸宋家
偃師及第進士為慈州軍事推官仁宗時以直昭文
館知河中府特拜天章閣待制右司郎中後司留臺
卒及所治有聲民吏愛之

呂公弼字寶臣夷簡子賜進士出身治平中拜樞密副
使神宗進樞密使將論新法罷為觀文殿學士知太
原府韓絳宣撫秦晉將取囉兀城令河東發兵二萬

趨神堂新堡公弼曰虜必設伏以待永和關雖回遠
可安行乃由永和既而新路援兵果遇伏詔褻之又
拓麟州城包淮沙泉於中以疾請知鄭州後拜宣徽
南院使卒謚惠穆

劉奉世字仲馮臨江新喻人敞子第進士元祐七年僉
書樞密院事章惇當國乞免去紹聖中邢恕劾之再
貶隰州團練副使政和中終端明殿學士奉世優於
吏治政尚安靜云

劉景文元祐中守隰州治以最稱

杜純字孝錫濮州鄆城人用蔭累官大理正隰州商尹
奇質溫泉磬有羨數云官潤之守欲械訊河東純曰
奇情止爾若傳致其罪恐自是民無復敢貨磬則數
百萬之儲皆為土石請姑沒其羨而釋其人卿楊汲
奏為立異廢於家元祐中擢侍御史終集賢院學士

附

金

施宜生邵武人天德中為隰州刺史有惠政

李曼高平人判隰州軍事政尚平易號為循良

楊貞吉州人父椿常為融州刺史貞擢明昌五年進士
仕至河東南路招撫吉隰便宜經畧使築牛心寨以
禦元兵寨臨黃河貞以甯德及子克義監戰克義死
之輿尸至貞嘆曰我以身報國子何足惜無何元兵
復自鄜延渡河圍吉安招撫張冲同知伍禮厚守之
禮厚貞子壻也元兵夜攻吉安堡并牛心寨事急貞

謂禮厚曰爾業進士致身五品亦欲降耶禮厚并其妻墜崖死之又謂子克敬克讓曰國事去矣吾不忍汝輩為人虜相繼墜巖死之夫人孟氏自縊死貞朝服南望痛哭再拜赴河死後數日屍橫河上門人張安石收葬焉

劉汲大定間由進士任蒲縣令政平訟簡民物康阜王天祐潞安府人太常博士進階奉議大夫知隰州頴性疎通偉才精勵屢議大禮國度以貞歷著治猷民

生允殖

元

王守忠潞州人至大間隰州判官佐政有方

韓昇隰州人為本州刺史以策干太師穆呼哩授千夫
長經畧有功授戶部尚書佩金虎符子奭相繼為本

州刺史

李良中山人由春官出為蒲縣主簿慈祥明決刑獄不

濫莅任半載四境晏如

楊思聰知大寧縣政平訟理蝗不入境

明

李昇塾屋人洪武初舉明經知永和縣坐事降五臺縣
典史以秋霜殺禾請賑獲罪百姓訴於朝特詔陞夔
州知府祀名宦

辛耀即墨人洪武間以工科給事中出知永和為政公
廉以農桑學校為首務累陞陝西按察使

霍毅蒲城人永樂間以刑部員外出任大寧公平忠厚

剖決詳明以縣地磽瘠諭民植桑棗以活興利除害
民安其業越三年復原官後擢本省僉事亦以振肅
聞

胡貞扶風人正統初知永和縣嘗買牛數百給貧民耕
種修廟學廳舍築城郭

墨春字景方高陵人成化元年以舉人知隰州仁以御
民嚴以束吏崇儒興教化民成俗

董瑜內黃人成化四年以舉人知隰州為政寬嚴得宜

百廢俱興歷任九載無大辟獄有靈芝嘉禾之異祀
名宦

艾芳弘治間知大寧縣居官清謹莅政嚴明重修城池
去之日民不能忘

劉統長安人弘治間蒲縣丞勤政勵操執法維嚴陞御
史

劉欽館陶人正德間知永和縣持身清苦以邑人曠學
朝夕督誘雖隆冬盛暑不倦歷六年士多有造

葛蘭信陽人嘉靖初知蒲縣斷獄明允鄰封不決者質成之倉庾盈溢遇歲荒賑濟有方民獲全

牛惠咸寧人嘉靖間知蒲縣秉性剛方立政廉平興革協宜吏畏民懷去任民歌之曰來時行李蕭然去時行李蕭然秦嶽祠前經過寸心不負皇天

韓超然山東臨淄人隆慶三年以貢生任蒲縣知縣清介有為於城池水利修舉必力而潔己愛民正供外絲毫無所染祀名宦

邵蕙陝西寧州人隆慶六年以舉人知大寧縣重築北寨建高覽樓增西關城門凡三於北寨內建書院於小寨中置倉舍又築南門外石堤以障河水久而不泐尋陞真定府通判

吳崇禮山東寧陽人萬曆十五年以進士知蒲縣潔己愛民歲荒多方賑貸尋以才調臨晉後官兵部尚書儲至俊字賓賢靖州人萬曆四十三年以貢知隰州植桑麻勸織紡修大觀樓開東門建文昌閣修學宮鑿

泮池初尊經閣招來流移輕徭薄賦貧民逋亡者咸
復業焉

余建隆開化人萬厯間知永和縣操履貞嚴踰年致仕
束裝無具隰州守親臨祖餞忽報有地坎陷得宋古
錢一窖守曰此天為廉吏賜也命市之以為資斧隨
一僕負傘而歸見者莫不嗟嘆

劉紹宗山東武城人知大寧縣政教兼舉考滿民赴部
保留復任三年

周培忠興平人崇禎七年知隰州當流寇陷城之後荒蕪滿目民私祝曰必得一清如水者來官此地可保萬全培忠至果如民願培養元氣萬民復業

史掌文直隸良鄉人崇禎間任大寧典史時盜賊蜂起掌文至適築濬城池因督其事鼓舞有方民咸樂於趨事復時走山谷親為緝捕盜靖民安壬申流寇集城下攻甚亟掌文分地守力屈死之

左中道崇禎間任大寧教諭端嚴有師範壬申流寇破

城或以無守土責勸之去中道斥之卒殉難死

國朝

郭瑄沙河人順治二年以貢知蒲縣蒲小邑俗頗椎魯
舞文吏多擅作威福以故逃亡日積瑄莅任風采凜
然人望而知畏性通敏里閭利病周知無遺凡有興
舉口勅手揮左右奉成命無敢以一言進者或用微
詞餽之輒大聲呵曰汝輩第奉行文書何得與民事
聞者胥胥咋舌退當時以鐵耳稱之後遷徽州府通判

徐士鶚浙江人順治六年任大寧縣典史姜逆之亂守城不少規避城破死之妻子亦偕死焉

鍾夢豹直隸宛平人順治間任永和縣典史姜逆之亂誓以身殉不屈死祀忠烈祠

王添貴遼陽人順治六年以貢生知隰州姜逆之變土賊蜂起隰在萬山中害尤劇添貴率大兵徑擣巢穴賊黨懼悉潰走添貴開諭令歸農乃釋戈涖州輯流亡修城垣興學校胥有政績而當率兵勦賊時將領

以居民從賊議屠城添貴懇請始獲免隲人至今德
之

吳興祚遼東清河人順治十二年以貢生知大寧縣大
寧介萬山流寇蹂躪後民多逋土田率蕪穢不治學
宮幾絕士跡興祚約束吏胥俾無得擾民利必興弊
必革捐俸修廟學獎厲文士餼不足者胥飲之再期
民多復業里閭寢聞絃誦聲後以治行報最遷官至
兩廣總督

李其昌字遜伯廣東程鄉人康熙初任隰州專防都司
十三年以病歸劉進忠叛脅與亂不屈賊掘地埋之
並殲其家子方猷裁十五歲顓官請復仇卒得賊首
祭父墓

梅銅字銅巖宣城人康熙十四年以進士知大寧縣嚴
取舍遇事洞見本末雖黠猾者不能眩厲精治簿書
有爭訟者以片言折之而不喜為鞭朴多委曲開導
令去馭吏胥獨嚴嘗誡曰百姓一杯水汝輩胥無得

妄受也後累官左都御史

山西通志卷一百

欽定四庫全書

山西通志卷一百一

人物一

山西人物唐虞尚矣繇夏暨元明彪炳竹素者多有而載籍所紀以勲名著十率得四五此秦晉人物之權衡也

國家損益百代甄叙九品維并汾右輔川呈嶽貢之才詰業烝烝嚮風而歷代人物亦胥列銓綜今次厥行

事如左忠烈不別編即列人物蓋非忠烈無以為人
物此又用義理權衡而定勲庸閎闊之差等也至有
以文章著者別為文苑附載簡末以存其槩云志人
物

太原府

周

唐叔虞武王子初武王夢天謂已曰余命女生子名虞
余與之唐及生子文在手曰虞遂因命之武王崩成

王立唐有亂周公誅滅唐成王與叔虞戲削桐葉為
珪以與叔虞曰以此封若史佚因請擇日立叔虞成
王曰吾與之戲耳史佚曰天子無戲言言則史書之
禮成之樂歌之於是遂封叔虞於唐故曰唐叔虞姓
姬氏字子千唐叔子變是為晉侯晉侯子寧族是為
武侯武侯之子服人是為成侯成侯子福是為厲侯
厲侯子宜臼是為靖侯靖侯已來年紀可推自唐叔
至靖侯五世無其年數靖侯十八年卒子釐侯司徒

立釐侯十八年卒子獻侯籍立獻侯十一年卒子穆侯費生立穆侯二十七年卒弟殤叔自立太子仇出奔四年仇率其徒襲殤叔而立

文侯仇平王東遷文侯迎送安定之平王錫以秬鬯圭瓚作文侯之命王若曰父義和丕顯文武克慎明德昭升于上敷聞在下惟時上帝集厥命于文王亦惟先正克左右昭事厥辟越小大謀猷罔不率從肆先祖懷在位嗚呼閔予小子嗣造天丕愆殄資澤于下

民侵戎我國家純即我御事罔或者壽俊在厥服予
則罔克曰惟祖惟父其伊恤朕躬嗚呼有績予一人
永綏在位父義和汝克紹乃顯祖汝肇刑文武用會
紹乃辟追孝于前文人汝多修扞我于艱若汝予嘉
王曰父義和其歸視爾師寧爾邦用賚爾秬鬯一卣
彤弓一彤矢百盧弓一盧矢百馬四匹父往哉柔遠
能邇惠康小民無荒寧簡恤爾都用成爾顯德
左傳平王
之東遷也晉鄭馬依書傳平王立而東遷洛邑晉文
侯迎送安定之王錫命馬史記以為襄王為文公作

誤 文侯三十五年卒子昭侯伯立昭侯元年封文侯

弟成師於曲沃靖侯庶孫欒賓傅之曲沃邑大於翼
號為桓叔桓叔好德晉國之衆皆附焉七年晉大臣
潘父弑昭侯而迎曲沃桓叔桓叔欲入晉晉人發兵
攻之桓叔敗還歸曲沃晉人共立昭侯子平為君是
為孝侯誅潘父孝侯八年曲沃桓叔卒子鱣代是為
曲沃莊伯孝侯十五年莊伯弑孝侯於翼晉人攻莊
伯莊伯復入曲沃晉人復立孝侯子郤為君是為鄂

侯鄂侯六年卒莊伯興兵伐晉周平王使虢公將兵
伐莊伯莊伯走保曲沃晉人共立鄂侯子光是為哀侯
哀侯二年莊伯卒子稱立是為曲沃武公哀侯八年
晉侵陘廷陘廷與武公謀九年伐晉於汾旁虜哀侯
晉人乃立哀侯子小子為君是為小子侯小子元年
武公使韓萬殺所虜晉哀侯晉小子之四年武公誘
召晉小子殺之周桓王使虢仲伐武公武公入於曲
沃乃立晉哀侯弟緡為晉侯晉侯緡二十八年武公

伐晉滅之

武公稱曲沃莊伯子也周釐王四年伐晉滅之盡以其寶器賂周釐王王命武公為晉君列為諸侯於是盡併晉地更號曰晉武公始都晉國自桓叔初封曲沃以至武公滅晉凡六十七歲而卒代晉為諸侯武公代晉二歲卒與曲沃通年即位凡三十九年而卒子獻公詭諸立獻公五年伐驪戎得驪姬及驪姬娣俱愛幸之八年士蒍說公盡殺諸公子而城聚都之命

曰絳始都絳十二年驪姬生奚齊獻公欲廢太子申
生乃使居曲沃公子重耳居蒲夷吾居屈公與驪姬
子奚齊居絳十六年獻公作二軍公將上軍申生將
下軍趙夙御戎畢萬為右滅霍滅魏滅耿還為申生
城曲沃賜趙夙耿賜畢萬魏二十一年驪姬譖申生
申生自殺於新城重耳奔狄夷吾奔梁二十二年滅
虢滅虞二十六年獻公病以奚齊為後使荀息傅之
公卒里克殺奚齊於喪次荀息立卓子而葬里克弑

卓子於朝苟息死之使迎重耳於狄重耳辭乃迎夷
吾於梁立之是為惠公六年九月秦繆公伐晉獲公
公姊繆公夫人請歸之十四年卒子圉立是為懷公
是年秦送重耳入晉殺懷公於高梁

文公重耳晉獻公子自少好士年十七有賢士五人曰
趙衰狐偃賈佗先軫魏武子獻公二十一年殺太子
申生重耳奔狄是時年四十三從此五士其餘不名
者數十人狄伐咎如得二女以長女妻重耳生伯儵

叔劉以少女妻趙衰生婚居狄五歲而獻公卒里克等殺奚齊卓子使人迎重耳重耳畏殺固辭克等迎其弟夷吾立之是為惠公惠公七年畏重耳乃使宦者履鞮與壯士欲殺重耳重耳聞之乃謀與趙衰等適齊居狄凡十二年而去過衛衛文公不禮去過五鹿飢而從野人乞食野人盛土器中進之重耳怒趙衰曰土者有土也君其拜受之至齊齊桓公厚禮而以宗女妻之有馬二十乘重耳安之留齊凡五歲齊

女與趙衰等謀醉重耳載以行過曹曹共公不禮欲
觀重耳駢脇曹大夫釐負羈諫之未從負羈乃私遺
重耳食置璧其下重耳受其食還其璧去過宋宋襄
公新困兵於楚傷於泓聞重耳賢乃以國禮禮於重
耳過鄭鄭文公弗禮鄭叔詹諫之不聽去之楚楚成
王以適諸侯禮待之厚遇重耳重耳甚卑成王曰子
即反國何以報寡人重耳曰羽毛齒角玉帛君王所
餘未知所以報王曰雖然何以報不穀重耳曰即不

得已與君王以兵車會平原廣澤請辟王三舍楚將
子玉怒請殺之成王曰晉公子賢而困於外久從者
皆國器此天所置庸可殺乎居楚數月而晉太子圉
亡秦秦怨之聞重耳在楚乃召之成王曰楚遠更數
國乃至晉秦晉接境秦君賢子其勉行厚送重耳至
秦秦繆公以宗女五人妻重耳故子圉妻與往重耳
不欲受司空季子曰其國且伐況其故妻乎且受以
結秦親而求入子乃拘小禮忘大醜乎遂受繆公大

歡與重耳飲趙衰歌黍苗詩繆公曰知子急欲反國
矣趙衰與重耳下拜曰孤臣之仰君如百穀之望時
雨是時惠公卒子圉立欒卻等皆陰求勸重耳趙衰
等反國為內應甚衆於是秦繆公乃發兵與重耳歸
晉重耳出亡凡十九歲而得入時年六十二矣晉人
多附襄王十七年二月辛丑入於晉丁未即位懷公
故大臣呂甥卻芮等恐誅與其徒謀燒公宮始嘗欲
殺公宦者履鞮知其謀以告公乃為微行會秦繆公

於王城誘呂卻等殺之河上晉國復而公得歸夏迎
夫人於秦秦所與文公妻者卒為夫人秦送三千人
為衛以備晉亂文公修改施惠百姓賞從亡者及功
臣大者封邑小者尊爵未至介子推推亦不言祿祿
亦不及與其母隱去不復見公聞其入綿上山中於
是環綿上山中而封之以為介推田號曰介山從亡
賤臣壺叔曰君三行賞賞不及臣請罪公報曰夫導
我以仁義防我以德惠此受上賞輔我以行卒以成

立此受次賞矢石之難汗馬之勞此復受次賞若以力事而無補吾缺者此受次賞三賞之後故且及子晉人聞之皆說二年春秦軍河上將入王趙衰曰求霸莫如入王尊周周晉同姓晉不先入王後秦入之母以令於天下方今尊王晉之資也三月甲辰公乃發兵至陽樊圍溫殺帶入襄王於周襄王賜公河內陽樊之地四年楚成王及諸侯圍宋宋公孫固如晉告急先軫曰報施定霸於今在矣狐偃曰楚新得曹

而初婚於衛若伐曹衛楚必救之則宋免矣於是作
三軍冬十二月晉兵下山東五年春文公欲伐曹假
道於衛衛人弗許還自河南渡侵曹伐衛正月取五
鹿二月與齊侯盟於斂孟衛侯請盟晉晉人不許衛
侯欲與楚國人不欲故出其君以說晉楚救衛不卒
晉侯圍曹三月丙午晉師入曹數之以其不用釐負
羈言而用美女乘軒者三百人也令軍毋入釐負羈
宗家以報德楚圍宋復告急文公欲救則攻楚為楚

嘗有德欲釋宋宋又嘗有德於晉患之先軫曰執曹伯分曹衛地以與宋楚急曹衛其勢宜釋宋於是文公從之而楚成王乃引兵歸楚將子玉請伐晉成王曰晉侯亡在外十九年困日久矣果得反國險阨盡知之能用其民天之所開不可當子玉固請之使宛春告晉請復衛侯而封曹臣亦釋宋咎先軫說公囚宛春於衛且私許復曹衛告絕於楚楚得臣怒擊晉師晉師退軍吏曰為何退文公曰昔在楚約退三舍

可倍乎楚師欲去得臣不肯四月戊辰宋公齊將秦
將與公次城濮己巳與楚兵合戰楚兵敗得臣收餘兵
去甲午晉師還至衡雍作王宮於踐土初鄭助楚楚
敗懼使人請盟公與鄭伯盟五月丁未獻楚俘於周
駟介百乘徒兵千天子使王子虎命晉侯為伯賜大
輅彤弓矢百旅弓矢千秬鬯一卣珪瓚虎賁三百人
晉侯三辭然後稽首受之於是晉文公稱伯盟諸侯
於王庭晉焚楚軍火數日不息公歎左右曰勝楚而

君猶憂何也公曰吾聞能勝而安者唯聖人且子玉猶在庸可喜乎楚成王歸讓責子玉子玉自殺公乃喜六月復入衛侯是年冬公會諸侯於溫欲朝周恐有畔者乃使人言襄王狩於河陽壬申遂率諸侯朝王於踐土丁丑圍許曹伯臣或說公復曹伯公從之七年與秦繆公共圍鄭以其無禮於公亡過時及助楚於城濮也九年冬卒子襄公歡立是歲秦繆公發兵襲鄭襄公元年春秦師滅滑而還晉擊之襄公墨

衰經四月敗秦師於穀遂墨衰經以葬文公四年秦
繆公大興兵伐我渡河取王官封穀尸而去五年晉
伐秦取新城六年趙衰藥枝咎犯先且居皆卒趙盾
代衰執政七年八月襄公卒趙盾使士蔑士會如秦
迎襄公弟公子雍繆嬴爭之盾畏誅乃背所迎而立
太子夷臯是為靈公發兵以拒秦送公子雍者敗之
於令狐先蔑隨會亡奔秦四年伐秦取少梁秦亦取
晉之穀六年秦康公伐晉取羈馬靈公怒使趙盾趙

穿卻缺擊秦大戰河曲趙穿最有功七年令魏壽餘
誘士會歸晉十四年靈公壯侈厚斂以彫牆從臺上
彈人觀其避丸宰夫胹熊蹯不熟公怒殺之趙盾隨
會前數諫不聽已又見死人手隨會先諫不聽公患
之使鉏麇刺趙盾不果已復飲趙盾酒伏甲將攻之
盾右提彌明禦而免遂奔未出晉境乙丑趙穿襲殺
靈公於桃園而迎趙盾盾使趙穿迎襄公弟黑臀於
周立之是為成公七年成公與楚莊王爭彊會諸侯

於扈復救鄭與楚戰敗之是年成公卒子據立是為
景公三年楚圍鄭晉使荀林父等救之楚與晉軍大
戰鄭新附楚畏之反助楚攻晉晉軍敗績楚虜我將
智瑩歸五年伐鄭為助楚故也七年使隨會滅赤狄
十一年使卻克櫟書韓厥與魯衛共伐齊與頃公戰
於鞏齊師敗走晉追北至齊頃公獻寶器以求平而
還十二年冬齊頃公如晉欲上尊景公為王景公讓
不敢晉始作六軍韓厥鞏鞏朔趙穿荀騅趙括趙旃皆

為卿智瑩自楚歸十三年伐鄭取汜十六年吳晉始
通約伐楚十七年誅趙同趙括族滅之韓厥請復趙
庶子武為趙後十九年夏景公病立其太子壽曼為
君是為厲公後月餘景公卒厲公元年初立欲和諸
侯與秦桓公夾河而盟歸而秦倍盟與狄謀伐晉三
年使呂相讓秦因與諸侯伐秦至涇敗秦於麻隧五
年三卻讒伯宗殺之厲公六年春鄭倍晉與楚盟厲
公自將伐之五月渡河聞楚兵來救與戰射中楚共

王目敗之於鄆陵晉由此威諸侯欲以今天下求霸
厲公多外嬖姬歸欲盡去羣大夫而立諸姬兄弟令胥
童以兵八百人襲攻殺三卻胥童因以甲劫欒書中
行偃於朝曰不殺二子患必及公公不忍使復位以
胥童為卿閏月乙卯厲公游匠麗氏欒書中行偃以
其黨襲捕厲公囚之殺胥童使人迎公子周於周而
立之是為悼公

悼公襄公少子桓叔之孫也簡王十四年正月厲公遇

弒晉使智螢迎立之時年十四矣公既立朝謂大夫曰大父父皆不得立而避難於周客死焉寡人自以疎遠母幾為君今大夫不忘文襄之意而惠立桓叔之後賴宗廟大夫之靈得奉晉祀豈敢不戰戰乎大夫其亦佐寡人於是逐不臣者七人修舊功施德惠收文公入時功臣後秋伐鄭鄭師敗遂至陳靈王二年會諸侯於雞澤公弟楊干亂行司馬魏絳戮其僕公怒或諫公公卒賢絳任之政使和戎戎大親附八

年之中九合諸侯公歸功於絳賜以金石之樂十年
冬秦取我櫟十三年公使六卿率諸侯伐秦度湮大
敗秦軍至棫林而去十四年公問治國於師曠師曠
曰唯以仁義為本是年冬公卒子平公彪立平公元
年伐齊戰於靡下齊師敗走晉追圍臨菑盡燒屠其
郭中東至膠南至沂乃歸六年逐欒逞奔齊八年欒
逞入於曲沃反襲入絳范獻子以其徒擊逞敗之於
曲沃殺逞遂滅欒氏二十六年平公卒子昭公夷立

昭公六年卒六卿彊公室卑子頃公去疾立頃公十
二年晉之宗家祁僕孫叔嚮子相惡於君六卿欲弱
公室乃遂以法盡滅其族而分其邑為十縣各令其
子為大夫晉益弱六卿皆大十四年頃公卒子定公
午立定公十五年趙鞅殺邯鄲大夫午中行寅范吉
射攻趙鞅鞅走保晉陽定公圍晉陽荀櫟韓不信魏
侈說公移兵伐范中行范中行敗走朝歌二十二年
晉敗范中行氏二子奔齊三十年公與吳王夫差會

黃池三十七年定公卒子出公鑿立出公十七年知伯與趙韓魏共分范中行地以為邑出公怒告齊魯欲以伐四卿四卿恐遂反攻出公奔齊道死知伯乃立昭公會孫驕為晉君是為哀公當是時晉國政皆決知伯哀公不得有所制哀公四年趙襄子韓康子魏桓子共殺知伯并其地十八年哀公卒子幽公柳立幽公之時晉反朝韓趙魏之君獨有絳曲沃餘皆入三晉十五年盜殺幽公魏文侯以兵誅晉亂立幽

公子止是為烈公烈公十九年周威烈王賜趙韓魏皆命為諸侯二十七年烈公卒子孝公頎立十七年孝公卒子靜公俱酒立靜公二年魏武侯韓哀侯趙敬侯滅晉後而三分其地靜公遷為家人

孝伯唐表成王封母弟孝伯於狄城為狄氏

寒侯路史狄子寒侯皆武穆也後各為氏羅革云漢有博士寒朗乃武王子寒侯後又云晉地五氏其一為寒

狐突字伯行重耳外祖父為獻公大夫公使申生伐東
山臯落氏衣之偏衣佩之金玦突御戎歎曰時事之
徵也衣身之文也佩衷之旗也故敬其事則命以始
服其身則衣之純用其衷則佩之度今命以時卒闕
其事也衣之危服遠其躬也佩以金玦棄其衷也服
以遠之時以闕之危涼冬殺金寒玦離胡可恃也雖
欲勉之狄可盡乎欲行羊舌大夫不可將戰突諫曰
昔辛伯云內寵竝后外寵二政嬖子配適大都耦國

亂之本也今亂本成矣立可必乎孝而安民子其圖
之與其危身以速罪也申生不從敗狄而反讒言益
起突杜門不出及重耳出亡突二子毛偃從之懷公
立弗召公執突曰子來則免對曰子之能仕父教之
忠古之制也策名委質貳乃辟也今臣之子名在重
耳有年數矣若又召之教之貳也父教子貳何以事
君淫刑以逞誰則無罪臣聞命矣乃殺之毛從文公
出亡及反國弟偃稱其賢讓之公使將上軍城濮之

戰毛設二旆退楚右師復與偃以上軍夾攻楚左師
潰毛子漆襄王十七年文公命為溫大夫

狐偃字子犯狐突次子惠王二十二年從重耳出亡及
柏谷卜適齊楚偃曰無卜焉夫齊楚道遠而望大不
可以困往道遠難通望大難走困往多悔困且多悔
不可以走望若以偃之慮其狄乎夫狄近晉而不通
愚陋而多怨走之易達不通可以竄惡多怨可以共
憂今若休憂於狄以觀晉國且以監諸侯之為其無

不成乃遂之狄獻公卒里克殺奚齊卓子及驪姬使告重耳於狄請入晉重耳欲許之偃不可曰夫堅樹在始始不固本終必槁落夫長國者唯知哀樂喜怒之節是以導民不哀喪而求國難因亂以入始以喪得國則必樂喪樂喪必哀生因亂以入則必喜亂喜亂必怠得是哀樂喜怒之節易也何以導民民不我導誰長重耳曰非喪誰代非亂誰納我偃曰偃也聞之喪亂有小大大喪大亂之剋也不可犯也父母死

為大喪讒在兄弟為大亂今適當之是故難重耳乃
辭使者呂甥等亦告公子夷吾於梁冀芮勸夷吾許
之因請君於秦繆公許諾乃使公子繫弔重耳於狄
以時不可失喪不可久說之觀其意重耳告偃偃曰
不可亡人無親信仁以為親是故置之者不始父死
在堂而求利人孰仁我人實有之我以微幸人孰信
我不仁不信將何以長利重耳出見使者曰君惠弔
亡臣又重有命重耳身亡父死不得與於哭泣之位

又何敢有他志以辱君義再拜不稽首而哭退而不
私繫退弔公子夷吾於梁如弔公子重耳之命冀芮
說夷吾出見使者再拜稽首起而不哭退而私於繫
以求入繫反致命繆公繆公曰吾與公子重耳仁再
拜不稽首不沒為後也起而哭愛其父也退而不私
不汲於利也欲納重耳繫說繆公置夷吾可成名於
天下故秦先置夷吾於晉是為惠公偃與重耳處狄
十二年而行過衛出五鹿乞食於野人野人與之塊

公子怒欲鞭之偃曰天賜也稽首受而載之及齊齊桓公妻之有馬二十乘公子安之姜氏勸公子行公子不可姜與偃謀醉而遣之醒以戈逐偃歷曹宋及鄭遂適楚楚送諸秦秦伯納女五人於重耳他日享之偃曰吾不如衰之文也請使衰相禮秦伯悅之衰王十七年秦伯納重耳於晉及河偃以璧授重耳曰臣負羈紲從君巡於天下臣之罪甚多矣臣猶知之而况君乎請由此亡公子曰所不與舅氏同心者有

如白水投其璧於河濟河偃及秦晉之大夫盟於郟
文公入於曲沃即位是年冬周亂襄王出居於鄭明
年春秦伯師於河上將納王偃言於公曰求諸侯莫
如勤王諸侯信之且大義也繼文之業而信宣於諸
侯今為可矣公從之辭秦師而下逆王入於王城因
朝王王饗醴命之宥與之陽樊溫原攢茅之田十八
年楚子及諸侯圍宋宋公孫固如晉告急偃曰楚始
得曹而新昏於衛若伐曹衛楚必救之則齊宋免矣

於是蒐於被廬作三軍使偃將上軍讓於狐毛而佐
之二十一年春公侵曹伐衛分曹衛之田楚子入居
於申子玉使宛春告於晉師請復衛侯而封曹先軫
說公拘宛春於衛且私許復曹衛曹衛告絕於楚子
王怒從晉師晉師退軍吏曰以君辟臣辱也且楚師
老矣何故退偃曰師直為壯曲為老豈在久乎微楚
之惠不及此退三舍辟之所以報也背惠食言以亢
其讐我曲楚直其衆素飽不可謂老我退楚還我將

何求若其不還君退臣犯曲在彼矣退三舍楚衆欲
止子玉不可夏四月晉侯宋公齊國歸父崔夭秦小
子憇次於城濮楚師背鄴而舍晉侯患之偃曰戰也
戰而捷必得諸侯若其不捷表裏山河必無害也公
夢與楚子搏楚子伏己而監其腦是以懼偃曰吉我
得天楚伏其罪吾且柔之矣及戰楚右師先潰偃與
兒毛以上軍夾攻楚左師敗績公歸國行賞偃為首
或曰城濮之事先軫之謀公曰城濮之事偃說我母

失信先軫曰軍事勝為右吾用之以勝然此一時之
功奈何一時之利而加萬世之功乎是以先之公始
入而教其民二年欲用之偃曰民未知義未安其居
於是出定襄王入務利民民懷生矣將用之偃曰民
未知信未宣其用於是伐原以示之信民易資者不
求豐焉明徵其辭公曰可矣乎子犯曰民未知禮未
生其共於是大蒐以示之禮作執秩以正其官民聽
不惑而後用之出穀成釋宋圍一戰而霸文之教也

偃子它字季食邑於賈稱賈季與偃同從文公出亡
過宋宗公孫固稱其多識以恭敬及反國官太師襄
王三十二年襄公蒐於夷舍使它將中軍陽處父至
自溫改蒐於董以趙盾易它公卒它欲立公子樂使
召於陳盾使殺諸郟它怨處父易其班是年秋使續
鞠居殺處父冬十月晉殺續鞠居它奔狄

陽處父晉人文公時大夫食采於陽襄王二十九年楚
鬬章請平於晉晉使處父報之晉楚始通明年晉使

處父侵蔡楚子上救之與晉師夾泚而軍處父使謂
子上曰吾聞之文不犯順武不違敵子若欲戰則吾
退舍子濟而陳遲速唯命不然紆我老師費財亦無
益也乃駕以待子上欲涉大孫伯不可乃退舍處父
宣言曰楚師遁矣遂歸楚師歸王殺子上晉以處父
為太傅三十二年晉蒐於夷舍使賈它將中軍處父
至自溫改蒐於董以趙盾易它且謂盾能曰使能國
之利也盾於是乎始為國政既成以授處父與它使

行諸晉國以為常法它怨之使續鞠居殺處父先是處父聘於衛反過甯甯嬴從之及溫而還其妻問之嬴曰以剛商書曰沈潛剛克高明柔克夫子壹之其不沒乎天為剛德猶不干時況在人乎且華而不實怨之所聚也犯而聚怨不可以定身余懼不獲其利而懼其難是以去之

祁奚晉人果而不淫悼公命為中軍尉未幾請老公問嗣焉稱解狐其讎也將立之而卒又問焉曰午也可

羊舌職死公問孰可代曰赤也可君子謂祁奚於是能舉善矣稱其雖不為諂立其子不為比舉其偏不為黨商書曰無偏無黨王道蕩蕩其祁奚之謂與解狐得舉祁午得位伯華得官建一官而三物備能舉善也夫為善故能舉其類詩云惟其有之是以似之祁奚有焉平公即位復起為公族大夫欒盈之難范宣子并叔向囚之樂王鮒見之曰吾為子請叔向弗應其人皆咎之叔向曰必祁大夫樂王鮒從君者也

何能行禘大夫外舉不避仇內舉不避親其獨遺我乎詩曰有覺德行四國順之夫子覺者也平公問叔向之罪王鮒以有對初奚聞之乘驛而見宣子曰詩曰惠我無疆子孫保之書曰聖有謨勲明徵定保夫謀而鮮過惠訓不倦者叔向有焉社稷之固也猶將十世宥之以勸能者今壹不免其身以棄社稷不亦惑乎鯀殛而禹興伊尹放太甲而相之卒無怨色管蔡為戮周公右王若之何其以虎也棄社稷子為善

誰敢不勉多殺何為宣子說與之乘以言諸公而免之不見叔向而歸叔向亦不告免焉而朝

初午父奚請代已為軍尉曰擇臣莫若君擇子莫若父
午之少也婉以從令游有鄉處有所好學而不戲其
壯也強志而用命守業而不盈其冠也和安而好靜
柔惠小物而鎮定大事有直質而無流心非義不變
非上不舉若臨大事其可以賢於臣也臣請薦所能
擇而君比義焉公使午為軍尉沒平公軍無秕政景

王四年從趙武會於虢午謂武曰宋之盟楚人得志於晉今令尹之不信諸侯之所聞也子弗戒懼又如宋子木之信稱於諸侯猶詐晉而駕焉況不信之尤者乎楚重得志於晉晉之恥也子相晉國以為盟主於今七年矣再合諸侯三合大夫服齊狄寧東夏平秦亂城淳于師徒不頓國家不罷民無謗讟諸侯無怨天無大災子之力也有令名矣而終之以恥午也是懼吾子其不可以不戒武從之後楚遠啓疆論晉

人稱午為諸侯之選

竇犢字鳴犢晉大夫孔子將西見趙簡子至河而聞其死臨河而歎曰美哉水洋洋乎丘之不濟此命也夫子貢趨而進曰敢問何謂也孔子曰竇鳴犢犢華晉國之賢大夫也趙簡子未得志之時須此兩人而後從政及其已得志殺之乃從政丘聞之也刳胎殺夭則麒麟不至郊竭澤涸漁則蛟龍不合陰陽覆巢毀卵則鳳凰不翔何則君子諱傷其類也夫鳥獸之於

不義也尚知辟之而況乎丘哉乃還息乎甌鄉作為
甌操以哀之國語趙簡子歎曰雀入於海為蛤雉入
於淮為蜃黿鼉魚鼈莫不能化唯人不能哀夫竇犢
侍曰臣聞之君子哀無人不哀無賄哀無德不哀無
寵哀名之不令不哀年之不登夫中行范氏不恤庶
難而欲擅晉國今其子孫將耕於齊宗廟之犧為畝
畝之勤人之化也何日之有陽曲縣西北四十里裂
石山有祠歲早有司禱雨多靈應

舜華晉賢大夫與竇鳴犢同遇害孔子哀之

鐸鳴狼孟人竇犢犢亦游於狼孟皆為晉大夫趙簡子
欲專天下謂其相曰趙有犢犢晉有鐸鳴魯有孔丘
吾殺三人者天下可王也於是乃召犢犢鐸鳴而問
政焉已即殺之使使者聘孔子於魯以胖牛肉迎於
河上使者謂船人曰孔子即上船中河必流而殺之
孔子至使者致命進胖牛之肉孔子仰天而歎曰美
哉水乎洋洋乎使丘不濟此水者命也夫子路趨而

進曰敢問何謂也孔子曰夫犢犢鐸鳴晉國之賢大夫也趙簡子未得意之時須而後從政及其得意也殺之黃龍不反於洞澤鳳凰不離其罽羅故刳胎焚林則麒麟不臻覆巢破卵則鳳凰不翔竭澤而漁則龜龍不見鳥獸之於不仁猶知避之况丘乎故虎嘯而谷風起龍興而景雲見擊庭鍾於外而黃鍾應於內夫物類之相感精神之相應若響之應聲影之象形故君子諱傷其類者今彼已殺吾類矣何為之此

乎於是遂回車

羊殖晉大夫趙簡子問於成搏曰吾聞夫羊殖者賢大夫也是行奚然對曰臣搏不知也簡子曰吾聞之子與友親而不知何也搏曰其為人也數變其十五年也廉以不匿其過其二十也仁以喜義其三十也為晉中軍尉勇以喜仁其年五十也為邊城將遠者復親今臣不見五年矣恐其變是以不敢知簡子曰果賢大夫也每變益上矣

封荼狄人趙簡子臣也簡子問於封荼曰吾聞狄雨穀
三日信乎曰信雨血三日信乎曰信馬生牛牛生馬
信乎曰信簡子曰大哉妖亦足以亡國矣對曰雨穀
三日蟲風之所飄也雨血三日鷲鳥擊於上也馬生
牛牛生馬雜牧也此非狄之妖也簡子曰然則狄之
妖奚也對曰其國數散其上幼弱其諸卿貨其大夫
比黨以求祿爵其百官肆斷而無告其政令不竟而
數化其士巧貪而有怨此其妖也

張孟談趙氏宰也知伯陰結韓魏將以伐趙趙襄子召孟談告之曰知伯之為人陽親而陰疎三使韓魏而寡人弗與焉其移兵寡人必矣今吾安居而可孟談曰夫董閔安于簡子之才臣也世治晉陽而君澤循之其餘政教猶存君其定居晉陽襄子從之行城郭案府庫視倉廩召孟談曰吾城郭之完府庫足用倉廩實矣無矢奈何談曰臣聞董子之治晉陽也公宮之垣皆以荻蒿苫楚牆之其高至丈餘君發而用之

於是發而試之其堅則苗露之勁不能過也襄子曰
矢足矣吾銅少若何談曰臣聞董子之治晉陽也公
宮之室皆以鍊銅為柱質請發而用之則有餘銅矣
襄子曰善號令已定備守已具三國之兵乘晉陽城
遂戰三月不能拔因舒軍而圍之決晉水而灌之圍
晉陽三年城中巢居而處懸釜而炊財食將盡士卒
病羸襄子謂孟談曰糧食匱財力盡士大夫病吾不
能守矣欲以城下何如孟談曰臣聞之亡不能存危

不能安則無為貴知士也君釋此計勿復言也乃請
陰見韓魏之君曰臣聞脣亡則齒寒今智伯帥二國
之君伐趙趙將亡矣亡則二君為之次矣二君曰我
知其然夫智伯之為人麤中而少親我謀未遂而知
則其禍必至為之奈何孟談曰謀出二君之口入臣
之耳人莫之知也二君即與孟談陰約三軍與之期
夜遣入晉陽孟談以報襄子襄子再拜之孟談因朝
智伯而出遇智過轅門之外智過入見智伯言二主

殆將有變智伯不聽智過出更其姓為輔氏遂去不
見孟談聞之入見襄子曰臣遇智過於棘門之外其
視有疑臣之心入見智伯出更其姓今暮不擊必後
之矣襄子使孟談見韓魏之君夜期殺守堤之吏而
決水灌智伯軍智伯軍救水而亂韓魏翼而擊之襄
子將犯其前大敗智伯軍而禽智伯孟談既固趙宗
廟封疆乃告襄子願損功名去權勢以離衆襄子曰
吾聞輔主者名顯功大者身尊任國者權重信忠在

已而衆服焉此先聖之所以集國家安社稷乎子何
為然對曰君之所言成功之美也臣之所謂持國之
道也臣觀成事聞往古天下之美同臣主之權均之
能美未之有也前事之不忘後事之師君若弗圖則
臣力不足遂便厚以便名納地釋事以去權尊而耕
於負親之邱耕三年韓魏齊楚燕負親以謀趙襄子
往見孟談告之孟談曰君其負劔而御臣以之國舍
臣於廟授吏大夫臣試計之襄子曰諾談乃行其妻

之楚長子之韓次子之魏少子之齊四國疑而謀敗
高共趙襄子臣智伯圍晉陽羣臣皆有外心禮益慢惟
共不敢失禮襄子滅智氏行賞共為上張孟同曰晉
陽之難唯共無功襄子曰方晉陽急羣臣皆懈唯共
不敢失人臣禮是以先之

藺相如趙人為趙宦者令繆賢舍人趙惠文王時得楚
和氏璧秦昭王遺趙書願以十五城易璧趙王與諸
大臣謀欲予秦秦城恐不可得欲勿予即患秦兵來

計未定求人可使報秦者未得繆賢曰臣舍人藺相如可使王問何以知之對曰臣嘗有罪竊計欲亡走燕相如止臣曰夫趙彊而燕弱而君幸於趙王故燕王欲結於君今君乃亡趙走燕燕畏趙其勢必不敢留君而東君歸趙矣君不如肉袒伏斧鑕請罪則幸得脫矣臣從其計大王亦幸赦臣臣竊以為其人勇士有智謀宜可使於是王召見相如問可與璧否相如曰秦彊而趙弱不可不許王曰取吾璧不予我城

奈何相如曰秦以城求璧而趙不許曲在趙趙予璧而秦不予趙城曲在秦均之一策寧許以負秦曲王曰誰可使者相如曰王必無人臣願奉璧往使城入趙而璧留秦城不入趙請完璧歸趙王遂遣相如奉璧西入秦秦王坐章臺相如奉璧奏秦王秦王大喜傳以示美人及左右左右皆呼萬歲相如視秦王無意償趙城乃前曰璧有瑕請指示王王授璧相如因持璧却立倚柱怒髮上沖冠謂秦王曰大王欲得璧

使人發書至趙趙王悉召羣臣議皆曰秦負其疆以
空言求璧償城恐不可得議不欲予臣以為布衣之
交尚不相欺況大國乎且以一璧之故逆疆秦之驩
不可於是趙王齋戒五日使臣奉璧拜送書於庭何
者嚴大國之威以修敬也今臣至大王見臣列觀禮
節甚倨得璧傳之美人以戲弄臣臣觀大王無意償
趙王城邑故臣復取璧大王必欲急臣臣頭今與璧
俱碎於柱矣相如持璧睨柱欲擊秦王恐破璧乃辭

謝固請召有司案圖指從此以往十五都予趙相如
度秦王特佯為予趙城實不可得乃謂秦王曰和氏
璧天下所共傳寶也趙王恐不敢不獻趙王送璧時
齋戒五日今大王亦宜齋戒五日設九賓於庭臣乃
敢上璧秦王度終不可彊奪遂許齋五日舍相如廣
成傳舍相如度秦王決負約不償城乃使其從者衣
褐懷璧從徑道亡歸璧於趙秦王齋五日後設九賓
禮於庭引趙使相如至謂秦王曰秦自繆公以來二

十餘君未嘗有堅明約束者也臣誠恐見欺於王而負趙故令人持璧歸間至趙矣且秦彊而趙弱大王遣一介之使至趙趙立奉璧來今以秦之彊而先割十五都予趙趙豈敢留璧而得罪於大王乎臣知欺大王罪當誅臣請就湯鑊秦王與羣臣相視而嘻因曰今殺相如終不能得璧也而絕秦趙之驩不如厚遇之使歸趙趙王豈以一璧之故欺秦耶卒廷見相如畢禮而歸之趙王以為賢大夫使不辱於諸侯拜

為上大夫秦亦不以城予趙趙亦終不予秦璧其後
秦王使使者告趙王欲與王好會於西河外澠池趙
王畏秦欲無行相如計曰王不行示趙弱且怯也趙
王遂行相如從遂與秦王會澠池秦王飲酒酣曰寡
人竊聞趙王好音請奏瑟趙王鼓瑟秦御史前書曰
某年月日秦王與趙王會飲令趙王鼓瑟藺相如前
曰趙王竊聞秦王善為秦聲請奉盆缶以相娛樂秦
王怒不許於是相如前進缶因跽請秦王不宥擊相

如曰五步之內相如請得以頸血濺大王矣左右欲
刃相如相如張目叱之左右皆靡於是秦王不懌為
一擊甄相如顧召趙御史書曰某年月日秦王為趙
王擊甄秦之羣臣曰請以趙十五城為秦王壽相如
亦曰請以秦之咸陽為趙王壽秦王竟酒終不能加
勝於趙趙亦盛設兵以待秦秦不敢動既罷歸國以
相如功大拜為上卿位在廉頗之右廉頗曰我為趙
將有攻城野戰之大功而藺相如徒以口舌之勞位

居我上且相如素賤人吾羞不忍為之下宣言曰我
見相如必辱之相如聞之不與會每朝常稱病不欲
與廉頗爭列已而相如出望見廉頗引車避匿舍人
相與諫曰臣所以去親戚而事君者徒慕君之高義
也今君與廉頗同列廉頗宣惡言而君畏匿之恐懼
殊甚且庸人尚羞之況將相乎臣等請辭去相如固
止之曰公視廉將軍孰與秦王曰不若也相如曰夫
以秦王之威而相如廷叱之辱其羣臣相如雖驚獨

畏廉將軍哉顧吾念之彊秦之所以不敢加兵於趙者徒以吾兩人在也今兩虎共鬪其勢不俱生吾所以為此者以先國家之急而後私讎也廉頗聞之肉袒負荆因賓客至門謝罪曰鄙賤之人不知將軍寬之至此也卒相與驩為刎頸之交後九年相如將而攻齊至平邑而罷及長平之役相如病篤王欲使趙括為將相如曰王以名使括若膠柱而鼓瑟耳括徒能讀其父書傳不知合變也王不聽軍遂大敗

廉頗趙之良將也惠文王十六年為將伐齊大破之取
晉陽拜為上卿以勇氣聞於諸侯秦王欲與趙王會
澠池頗送至境與王訣曰王行度道里會遇之禮畢
還不過三十日三十日不還則請立太子為王以絕
秦望王許之是歲東攻齊破其一軍居二年復伐齊
幾拔之後三年攻魏防陵安陽拔之及長平之役使
頗將攻秦秦數敗趙軍趙軍固壁不戰秦數挑戰頗
不宥戰趙王使趙括代頗將軍遂大敗後五年燕粟

腹謀曰趙壯者盡於長平其孤未壯舉兵擊趙趙使
廉頗將擊大破燕軍於部殺栗腹遂圍燕燕割五城
請和乃聽之趙以尉文封為信平君拜假相國頗免
長平歸故客盡去及復用為將客又復至頗曰客退
矣客曰吁君何見之晚也夫天下以市道交君有勢
我則從君君無勢則去此固其理也有何怨乎居六
年趙使頗伐魏繁陽拔之趙孝成王卒子悼襄王立
使樂乘代頗頗怒攻樂乘乘走頗遂奔魏之大梁久

之魏不能信用趙以數困於秦兵思復得廉頗頗亦
思復用於趙趙王使使者視頗尚可用否頗之仇郭
開多與使者金令毀之使者既見頗頗為一飯斗米
肉十斤被甲上馬以示尚可用趙使者還報王曰廉
將軍雖老尚善飯然與臣坐頃之三遺矢矣趙王以
為老遂不召楚聞頗在魏陰使人迎之頗一為楚將
無功曰我思用趙人頗竟卒於壽春

周倭韓臣或謂韓公仲曰昔者周倭以西周善於秦而

封於梗陽

漢

石奮其父趙太原人趙亡徙溫奮年十五高祖召其姊
為美人以奮為中涓徙其家長安中戚里奮積功勞
孝文時官至大中大夫無文學恭謹無與比時選可
為太子傅者皆推奮為太子太傅孝景即位為九卿
徙諸侯相奮長子建次甲次乙次慶皆以馴行孝謹
官至二千石景帝曰石君及四子皆二千石人臣尊

寵舉集其門號奮為萬石君孝景季年以上大夫祿
歸老於家歲時豫朝請過宮門闕必下車趨見路馬
必軾馬子孫為吏來歸謁必朝服見之不名子孫有
過失不諛讓為便坐對案不食然後諸子相責因長
老肉袒固謝罪改之乃許子孫勝冠者在側雖燕必
冠申申如也童僕訢訢如也唯謹上時賜食於家必
稽首俯伏而食如在上前其執喪哀戚甚子孫遵教
亦如之奮家以孝謹聞郡國雖齊魯諸儒質行皆自

以為不及也建元二年王臧獲罪皇太后以為儒者
文多質少今萬石君家不言而躬行乃以長子建為
郎中令少子慶為內史慶嘗醉歸入外門不下車奮
聞之不食慶恐肉袒謝請罪不許舉宗及兄建肉袒
奮讓曰內史貴人入閭里里中長老皆走匿而內史
坐車中自如固當乃謝罷慶慶及諸子入里門率趨
至家奮元朔五年卒

衛綰代大陵人以戲車為郎事文帝功次遷中郎將醇

謹無他孝景為太子召上左右飲而綰稱病不行文
帝嘗屬曰綰長者善遇之及景帝立日以謹力景帝
幸上林詔中郎將驂乘還而問曰君知所以得驂乘
乎綰曰臣代戲車士幸得功次遷待罪中郎將不知
也上曰吾昔召君君不肖來何也對曰死罪病上賜
之劔綰曰先帝賜臣劔凡六不敢奉詔上使取六劔
劔常盛未嘗服也郎官有謹常蒙其罪不與他將爭
有功常讓 he 將上以為庶忠實無他腸拜為河間王

太傅將河間兵擊吳楚有功拜中尉三歲以軍功封
建陵侯明年拜太子太傅遷御史大夫五歲代劉舍
為丞相朝奏事如職所奏上以為敦厚可相少主尊
寵之賞賜甚多為丞相三歲武帝立建元中以不任
職免後薨謚曰哀子信嗣坐酎金國除

石建奮長子馴行孝謹官至二千石擢郎中令奏事上
前即有可言屏人乃言極切至廷見如不能言者上
以是親而禮之嘗奏事下建讀之驚恐曰書馬者與

尾而五今乃四不足一獲譴死矣其謹慎如此建老
白首奮尚無恙每五日洗沐歸謁親入子舍竊問侍
者取親中裯廁踰身自澣洒復與侍者不敢令奮知
之以為常奮卒哭泣哀思杖乃能行歲餘亦卒奮諸
子孫咸孝然建最甚甚於萬石君奮

石慶奮少子馴行孝謹仕至二千石擢內史遷太僕卿
嘗御出上問車中幾馬慶以策數馬畢舉手曰六馬
慶於兄弟中最為簡易猶謹慎若此出為齊相齊國

慕其家行不煩而齊國大治為立石相祠元狩元年
立太子自沛守為太子太傅七歲遷御史大夫元鼎
五年制詔御史萬石君先帝尊之子孫至孝其以御
史大夫慶為丞相封牧邱侯是時漢方南誅兩粵東
擊朝鮮北逐匈奴西伐大宛天子巡狩海內修古神
祠封禪興禮樂公家用少桑弘羊等致利王溫舒之
屬峻法兒寬等推文學九卿更進用事事不關決於
慶慶醇謹而已在位九歲無能有所匡言嘗請治上

近臣所忠九卿咸宣不能服反受其過贖罪元封四年關東流民二百萬口無名數者四十萬公卿議請徙流民於邊上以為慶老謹不能與其議乃賜慶告歸而案御史大夫以下議請者慶上書曰臣幸得待罪丞相疲駑無以輔治城郭倉廩空虛民多流亡罪當伏斧鑕上不忍致法願歸丞相侯印乞骸骨歸避賢者路上報責讓之慶甚懼不知所出遂復起視事慶為丞相文深審謹無他大略後三歲餘卒謚曰恬

侯中子德嗣後為太常坐法免國除慶為丞相時諸子孫為小吏至二千石者凡十二人

常惠太原人少貧自奮應募隨移中監蘇武北使并見拘留十餘年昭帝時乃還拜光祿大夫宣帝本始二年遣惠使烏孫公主及昆彌皆遣使因惠來言於是漢大發十五萬騎五將軍分道出以惠為校尉持節護烏孫兵昆彌自將五萬餘人從西方入至右谷蠡庭獲三萬九千人得馬牛驢羸橐駝五萬餘匹羊六

十餘萬頭時漢五將皆無功以惠奉使克獲遂封長
羅侯復遣持金幣還賜烏孫有功者惠因奏請龜茲
國嘗殺校尉賴丹未伏誅請便道擊之宣帝不許大
將軍霍光風以便宜從事惠與吏士五百人俱至烏
孫還過發西國兵二萬人令副使發龜茲東國二萬
人烏孫兵七千人從三面攻龜茲兵未合先遣人責
其王以前殺漢使狀王謝曰乃我先王時為貴人姑
翼所誤耳我無罪惠曰既如此縛姑翼來吾置王王

執姑翼詣惠惠斬之而還後代蘇武為典屬國明習外國事勤勞數有功甘露中後將軍趙充國卒以惠為右將軍典屬國如故後事元帝三歲卒謚壯武侯趙破奴太原人嘗亡入北已而歸漢為票騎將軍司馬出北地封從票侯坐酎金失侯後一歲為匈河將軍至匈河水無功後一歲擊虜樓蘭王復為浞野侯後六歲以浚稽將軍將二萬騎左王兵八萬騎圍之為其所得軍遂沒復與其子安國亡入漢

郇越字臣仲郇相字穉賓太原人同族昆弟也竝舉州郡孝廉茂材數病去官越散其先人貲千餘萬以分施九族州里志節尤高相王莽時徵為太子四友病卒莽太子遣使祝以衣衾其子攀棺不聽曰死父遺言師友之送勿有所受今於皇太子得託友官故不受也京師稱之

劉茂字子衡太原晉陽人少孤獨與母居以筋力致養孝行著於鄉里及長能習禮經教授常數百人哀帝

時察孝廉再遷五原屬國侯母憂去官後為沮陽令
王莽時棄官避世弘農山中教授建武二年歸為郡
門下椽時赤眉二十餘萬攻郡茂負太守孫福踰牆
藏空穴中得免其暮俱奔孟縣晝則逃隱夜求糧食
積百餘日賊去乃得歸府明年詔書求天下義士福
言茂曰臣前為赤眉所攻吏民壞亂奔走趣山臣為
賊所圍命如絲髮賴茂負臣踰城出保孟縣茂與弟
觸冒兵刃緣山負食臣及妻子得度死命節義尤高

宜蒙表擢以勵義士詔書即徵茂拜議郎遷宗正丞
後拜侍中卒官

令狐邁太原人秦太原守五馬亭侯範十四世孫為建
威將軍與翟義起兵討王莽敗死三子伯友文公稱
皆奔燉煌

溫序字次房太原祁人仕州從事建武二年騎都尉弓
里戍將兵平定北州到太原歷訪英俊後問以策謀戍
見序奇之上疏薦焉徵為侍御史遷武陵都尉病免

官六年拜謁者遷護羌校尉行部至襄武為隗囂別將苟宇所拘劫宇謂序曰子若與我并威同力天下可圖也序曰受國重任分當效死義不貪生苟背恩德宇等復曉譬之序素有氣力大怒叱宇等曰虜何敢迫脅漢將因以節搃殺數人賊衆爭欲殺之宇止之曰此義士死節可賜以劍序受劍銜鬚於口顧左右曰既為賊所迫殺無令鬚汙土遂伏劍而死序主簿韓遵從事王忠持屍歸殮光武聞而憐之命忠送

喪到洛陽賜城傍為冢地賻穀千斛縑五百尺除三子為郎中長子壽服竟為鄒平侯相夢序告曰父客思鄉里壽即棄官上書乞骸骨歸葬帝許之乃反舊塋焉

令狐子伯太原人與同郡高士王霸友善後為楚相子為郡功曹

郝絜太原人與同郡胡武郎中袁著友善三人皆危言高論嘗連名奏記三府薦海內高士而不詣大將軍

梁冀冀銜之會著上書指冀凶縱冀笞殺著又疑絜武為著黨勅中都官移檄捕前奏記者絜初逃亡知不得免因輿櫬奏書冀門書入仰藥而死家乃得全及冀誅有詔以禮祀著等三人

胡武太原人與袁著郝絜竝懼梁冀之禍冀誅武家死者六十餘人

郭泰字林宗太原介休人家世貧賤早孤母欲使給事縣廷泰曰大丈夫馬能處斗筭之役乎遂辭就成臯

屈伯彥學三年業畢博通墳籍善談論美音制乃游於洛陽始見河南尹李膺膺大奇之遂相友善於是名震京師後歸鄉里衣冠諸儒送至河上車數千兩泰唯與膺同舟而濟衆賓望之以為神仙焉司徒黃瓊辟太常趙典舉有道或勸泰仕進對曰吾夜觀乾象晝察人事天之所廢不可支也遂竝不應性明知人好獎訓士類身長八尺容貌魁偉裋衣博帶周游郡國士爭歸之載刺盈車嘗於陳梁間行遇雨中一

角塾時人乃故折中一角以為林宗中其見慕如此
或問汝南范滂曰郭林宗何如人滂曰隱不違親貞
不絕俗天子不得臣諸侯不得友吾不知其他後遭
母喪嘔血發病歷年乃瘳有至孝稱泰雖善人倫而
不為危言覈論故宦官擅政而不能傷也及黨事起
知名之士多被其害唯泰及汝南袁閎得免遂閉門
教授弟子以千數建寧元年太傅陳蕃大將軍竇武
為閎人所害泰哭之於野慟既而歎曰人之云亡邦

國殄瘁瞻烏爰止不知於誰之屋耳二年春正月卒
於家年四十二自弘農函谷關以西河內湯陰以北
二千里負笈荷擔彌路柴車輦裝塞塗蓋有數萬來
赴同志者乃共刻石立碑蔡邕為文既而謂涿郡盧
植曰吾為碑銘多矣皆有慙德惟郭有道無愧色耳
凡泰之所名人品乃定先言後驗衆皆服之故適陳
留則友符偉明遊太學則師仇季智之陳國則親魏
德公入汝南則交黃叔度初泰適袁奉高不宿而去

從叔度累日不去或問之泰曰奉高之器譬之泛濫
雖清而易挹叔度之器汪汪若干頃之陂澄之不清
清之不濁不可量也已而果然泰以是名聞天下後
之好事或附益增張故多華詞不經又類卜相之書
今錄其章章效於事者著之篇末 鉅鹿楊氏人孟
敏字叔達客居太原荷甌墮地不顧而去林宗見而
問其意對曰甌已破矣視之何益林宗以此異之因
勸令游學十年知名三公俱辟竝不屈去 陳留人

茅容字季偉年四十餘耕於野時與等輩避雨樹下
衆皆夷踞相對容獨危坐愈恭林宗見竒之遂與言
因請寓宿旦日容殺雞為饌林宗謂為已設既而以
供其母自以草蔬與客同飯林宗起拜曰卿賢乎哉
因勸令學卒以成德 潁川鄆陵人庾乘字世遊少
給事縣廷為門士林宗見而拔之勸游學宮遂為諸
生傭後能講論自以卑第每處下坐諸生博士皆就
讎問由是學中以坐下為貴徵辟不起號曰徵君

晉陽人王柔字叔優弟澤字季道兄弟總角共候林宗以訪才行所宜林宗曰叔優當以仕進顯季道當以經術通然違方改務亦不能至也後果如所言柔為護匈奴中郎將澤為代郡太守 扶風人宋果字仲乙性輕悍喜與人報讎為郡縣所疾林宗乃訓之義方懼以禍敗果感悔叩頭謝罪遂改節自飭後以烈氣聞辟公府侍御史并州刺史所在能治 陳留人左原為郡學生犯法見斥林宗嘗遇諸路為設酒

者以慰之謂曰昔顏涿聚梁甫之巨盜段干木晉國之大駟卒為齊之忠臣魏之名賢遽瑗顏回尚不能無過況其餘乎慎勿恚恨責躬而已原納其言而去或有譏林宗不絕惡人者對曰人而不仁疾之已甚亂也原後欲報諸生其日林宗在學原愧負前言遂去後事露衆人咸謝服焉 林宗鄉人賈淑字子厚雖世有冠冕而性險害邑里患之林宗遭母憂淑來修弔既而鉅鹿孫威直亦至威直以林宗賢而受惡

人弔心怪之不進而去林宗追謝之曰賈子厚誠凶
德然洗心向善仲尼不逆互鄉故吾許其進也淑聞
之改過自厲終成善士鄉里有憂患者淑輒傾身營
救為州閭所稱 汝南召陵人謝甄字子微與陳留
邊讓竝善談論俱有盛名每候林宗未嘗不連日達
夜林宗謂門人曰二子英才有餘而竝不入道惜乎
甄後不拘細行為時所毀讓以輕侮曹操操殺之
陳留人史叔賓少有盛名林宗見而告人曰牆高基

下雖得必失後果以論議阿枉敗名云 濟陰人黃允字子艾以雋才知名林宗見而謂曰卿有絕人之才足成偉器然恐守道不篤將失之矣後司徒袁隗欲妻以從女允聞而黜遣其妻夏后氏以此廢於時林宗嘗識張孝仲芻牧之中知范特祖郵置之役召公子許偉康竝出屠沽司馬子威拔自卒伍及同郡郭長信王長文長文弟允子師韓文布李子政曹子元定襄周康子西河王季然雲中邱靈舉季智郝

禮徵等六十人竝以成名子師位至司徒季然北地
太守其餘多典州郡

王允字子師太原祁人世仕州郡為冠蓋同郡郭林宗
嘗見允竒之曰王生一日千里王佐才也遂與定交
年十九為郡吏時小黃門晉陽趙津貪橫放恣為一
縣巨患允討捕殺之而津兄弟諂事宦官因緣譖訴
桓帝震怒徵太守劉瓊下獄死允送喪還平原終三
年乃歸郡人路佛少無名行太守王球召補吏允犯

顏固爭球怒收允欲殺之刺史鄧盛聞而馳傳辟為
別駕從事允由是知名而路佛由是廢棄允少好大
節有志立功常習誦經傳朝夕試馳射三公竝辟以
司徒高第為侍御史中平元年黃巾賊起特選拜豫
州刺史辟荀爽孔融等為從事請除黨禁討擊黃巾
別帥大破之與左中郎將皇甫嵩右中郎將朱雋等
受降數十萬於賊中得中常侍張讓賓客交通書具
發其奸靈帝責怒讓讓叩頭陳謝竟不能罪之而讓

懷挾忿怨以事中允明年遂傳下獄會赦還復刺史
旬日復以他罪捕司徒楊賜遣客謝曰君以張讓故
一月再徵凶慝難量幸為深計之諸從事好氣決者
共流涕奉藥進之允厲聲曰吾為人臣獲罪於君當
伏大辟以謝天下豈有乳藥求死乎投杯而起出就
檻車至廷尉大將軍何進太尉袁隗司徒楊賜共上
疏曰夫內視反聽則忠臣竭誠寬賢矜能則義士勵
節是以孝文納馮唐之說晉悼宥魏絳之罪允以特

選受命誅逆撫順曾未期月州境澄清方欲列其庸
勲請加賞爵而以奉事不當當肆大戮賞輕罰重有
虧衆望臣等備位宰相不敢寢默誠以允宜蒙三槐
之聽以昭忠貞之心書奏減死論明年得釋變易姓
名轉側河內陳留間及何進欲誅宦官召允與謀事
請為從事中郎轉河南尹獻帝即位拜太僕再遷守
尚書令初平元年為司徒守尚書令如故董卓遷都
關中允悉收斂蘭臺石室圖書秘緯要者以從分別

條上又集漢朝舊事所當施用者一皆奏之經籍具
存允有力焉時董卓尚留洛陽朝政大小悉委允允
矯情屈意每相承附卓亦推心不生乖疑允密與司
隸校尉黃琬尚書鄭公業等共謀誅之乃上護羌校
尉楊瓚行左將軍事執金吾士孫瑞為南陽太守竝
將兵出武關道以討袁術為名實欲分路征卓而後
奉天子還洛陽卓疑而留之允乃引內瑞為僕射瓚
為尚書二年卓還長安錄允入關功封溫侯食邑五

千戶固讓不受士孫瑞說允曰夫執謙守約存乎其時公與董太師竝位俱封而獨崇高節豈和光之道耶允納其言乃受三千戶三年春連雨六十餘日允與士孫瑞楊瓚登臺請霽復結前謀瑞曰自歲末以來太陽不照霖雨積時月犯執法彗孛字仍見晝陰夜陽霧氣交侵此期應促盡內發者勝幾不可後公其圖之允然其言乃潛結卓將呂布使為內應會卓入賀呂布因刺殺之允初議赦卓部曲呂布亦數勸之

既而疑曰此輩無罪從其主耳今若名為惡逆而特赦之是適使其自疑也呂布欲以卓財物班賜公卿將校允又不從而素輕布以劔客遇之布亦負其功勞漸不相平允性剛稜疾惡初懼董卓豺狼故折節圖之卓既殲滅自謂無患接人每乏溫潤之色仗正持重不循權宜是以羣下不甚附之董卓將校多涼州人允議罷其軍或曰涼州人素憚袁氏而畏關東今若一旦解兵必人人自危可以皇甫義真為將軍

就領其衆因使留陝以安撫之而徐與關東通謀以觀其變允曰不然關東舉義皆吾徒今若距險屯陝是欲安涼州而先疑關東之心也時百姓訛言當悉誅涼州人遂轉相恐動其在關東者皆擁兵自守曰丁彥思蔡伯喈以董公親厚竝徙坐今既不赦我曹若今日解兵明日當復為魚肉矣卓部曲將李傕郭汜等先將兵在關東因合謀為亂攻圍長安城陷呂布駐馬青瑣門外招允曰公可以去乎允曰若蒙社稷

之靈上安國家吾之願也如其不獲則奉身以死之
朝廷幼少恃我而已臨難苟免吾不忍也努力謝關
東諸公勤以國家為念初允誅董卓以王宏為右扶
風宋翼為左馮翊翼亦允同郡人也是時三輔民庶
熾盛兵穀富實李傕等欲即殺允懼二郡為患乃先
徵翼宏宏遣使謂翼曰郭汜李傕以我兩人在外故
未危王公今日就徵明日俱族計將安出翼曰雖禍
福難量然主命所不得避也宏曰義兵鼎沸在於董

卓况其黨與乎若舉兵共討君側惡人山東必應之
此轉禍為福之計也翼不從宏不能獨立遂俱就徵
下廷尉催遂收允及宗翼王宏竝殺之允時年五十
六長子侍中蓋次子景定及宗族十餘人皆見害惟
兄子晨陵得脫歸天子感慟百姓喪氣莫敢收允尸
者故吏平陵令趙戩棄官營喪後遷都於許帝思允
終使改殯葬之遣虎賁中郎將奉策吊祭賜東園祕
器贈以本官印綬送還本郡封其孫黑為安樂亭侯

食邑三百戶

王柔字叔優柔弟澤字季道太原晉陽人郭林宗傳曰
叔優季道少時聞林宗有知人之鑑往候之請問才
行取宜以自處林宗笑曰鄉二人皆二千石才也雖
然叔優當以仕宦顯季道宜以經術進若違才易務
亦不至也叔優等從其言叔優至北中郎將季道代
郡太守

王宏字長文司徒王允同郡人少有氣力不拘細行為

弘農太守考案郡中事宦官買爵位者雖位至二千石皆掠考收捕遂殺數千人威動鄰界宏素與司隸校尉胡种有隙种遂迫促殺之宏臨命詬曰宋翼豎儒不足議大計胡种樂人之禍禍將及之种後眠輒見宏以杖擊之因發病數日死

李仲房太原人馮衍集曰鮑永行將軍事安集并州擁兵屯太原與太原李仲房同心并力

山西通志卷一百一